

東

華

續

錄

東華續錄

咸豐十九

臣王先謙敬編

臣陶濬宣恭校

咸豐三年癸丑春正月丙午朔 上御太和殿受朝作樂宣表如儀禮成御乾清宮賜近支親藩等宴每歲皆如之○戊申諭內閣張亮基奏勦辦土匪情形一摺據稱瀏陽縣土匪有徵義堂名目其初原爲保衛身家並無異志後因附和日多良莠不一遂致把持官吏藐不畏法本年七月始有糾眾搶掠之事經該撫委令通判裕麟委員孔昭文武舉諸殷元前往訪查復密飭陝西卽補知府江忠源於勦辦土匪晏仲武之便馳往曉諭並相機辦理該匪等膽敢糾眾分路來撲江忠源亦分路出擊並於唐家洲設伏該匪遇伏失措猶恃眾抗拒勇目何正杭爭先陷陣各勇短兵相接

嶺上之勇亦乘勢壓下武生艾國興立斬執旗匪目三名其撲城之匪亦經千總李輔朝擊敗共傷斃賊匪三百餘人生擒五十三名割取首級一百十八顆奪獲軍械甚多見仍咨行總兵經文岱督帶兵勇防其竄路又札飭各團協力兜剿並諭該處良民能擒獻匪首者立予重賞當不難解散黨與以淨根株又據奏稱攸縣遊匪黃杰高等受逆匪僞札煽聚七百餘人經該縣知縣郭世闡把總王佐清統帶兵勇先將該匪謝友百曾念齊父子巢穴燒毀武生譚國昌等堵賊竄路賀家訓等分伏左右鄉勇陳傳芳前往誘賊該匪被誘入伏王佐清首先陷陣手刃十餘人兵勇奮擊立將匪首黃杰高斬首伏兵並發殺斃僞司馬總鎮總旗三人並匪首劉起受等計殲擒一百七十餘人奪獲軍械無算見仍飭委員張榮組帶兵馳往勦辦自無難盡數殲獲其郴州桂東縣等處有

江西匪徒闖入辰州府洪江一帶亦有匪徒蹤迹並著飭令各鎮營調撥兵勇迅速掩捕無再養癰貽患至各鄉團練原以保衛身家如果得公正紳民立法盡善不特鄉閭平日賴以安輯一旦有事並可協助官兵翦除匪類卽如長沙城外賊匪竄逸之時白箬鋪一帶鄉團居民均能殺賊出力是其明效若但名爲團練不能稽查約束以致奸匪溷迹其中恃眾抗官是不但無益於事且爲地方之害必應嚴加懲辦使匪徒知儆若一味消弭勢必釀成巨患朕思除莠卽以安良卽有會匪地方亦莠民少而良民多封疆大吏惟當翦除首惡卽可保衛善良所有瀏陽攸縣各處匪徒卽著該署督撫等認真查辦並著會同在籍侍郎曾國藩體察地方情形應如何設法團練以資保衛之處悉心妥籌辦理○諭張亮基奏查明逆匪蕭潮潰竇已轟斃等語蕭潮潰一犯係賊中著名

凶悍首逆僞號西王經生擒賊黨羅五等供稱該逆前在長沙城外被破轟斃屍埋老龍潭地方見已起獲屍身驗明梟挫並將羅五等六犯剜心致祭陣亡將士差足洩公憤而慰忠魂逆賊洪秀泉等肆擾楚粵罪惡滔天所有著名逆黨非死卽逃見在所餘無幾著統兵大臣暨各督撫等曉諭軍營將弁兵勇及地方文武並紳民人等合力同心共殄醜類至脅從之徒本非甘心從逆如能擒殺賊匪自拔來歸者不但免其治罪並可立邀重賞見在大兵雲集四面兜剿該逆等罪惡貫盈神人共憤斷不能久稽顯戮也  
○諭軍機大臣等陸建瀛奏安徽防守情形等語據稱東西梁山及荻港均須撥兵一千名藉資防守陸建瀛統轄三省所議自係通籌全局著楊文定蔣文慶迅卽酌撥安設其上游小孤山一帶著仍遵前旨不可撤防庶安徽之門戶亦資筦鑰至撫藩大員乃

一省之民望方將勸諭紳民持以鎮靜豈可先將眷屬移徙以惑人心且當此防堵緊要之時若再不和衷共濟竭力籌維必致良民逃避土匪橫行逆賊將乘虛而入該督撫均不能辭罪也懷之將此由六百里加緊各諭令知之○諭陸建瀛奏江南兵汎流西上勢逆而難若有兵從襄陽順流而下直抵漢口牽制賊匪使不能剋期東下則江南追兵徑赴武昌可期兜剿取勝等語荆襄一帶地居上游見在添調防守兵力尙單勢難分兵東下昨據向榮奏調盧應翔所帶礮船及音德布韓世禧鄧紹良各帶官兵於常德岳州長沙一帶多雇船隻豫備火攻之具駛至荆口將賊船及浮橋燒毀卽是從上游出兵制賊東下之意已疊諭張亮基等如數趨發不准藉詞畱緩著向榮迅速催調俟礮船一到卽飛咨琦善陸建瀛等各路進兵合力兜剿毋失事機至廣州府武昌縣爲

省城東面門戶若任賊踞守江南兵何由前進當乘該處賊數未多盤踞未久卽行遣兵截擊與下游聲勢方可聯絡朕屢次諭向榮派兵繞赴九江想已迅往應援昨徐廣縉奏大營兵勇見在暫撤卓刀泉駐紮等語武昌被賊踞守主客之勢互易必應相機進取毋任賊得從容布置分竄下游其湖北糧臺尙無定設地方賊情狡猾萬一斷我餉道大局尤爲可慮該大臣遇事勇敢於一切事宜仍須隨時隨事妥籌辦理不可稍涉大意致有疏虞將此由六百里加緊諭令知之○命河南巡撫陸應穀駐紮南陽一帶幫同欽差大臣琦善辦理防勦事宜○己酉安徽巡撫蔣文慶奏省垣狹薄賊近兵單請移調東西梁山等處兵勇力爭上游相機防禦得旨已有旨令陸建瀛與汝不分畛域熟籌防勦矣安省有失江督亦難辭咎汝可慎籌速辦勿爲浮言所惑尤貴和衷若省垣

先自搖亂則合省不可問矣汝設想此何時何事若不將意見關  
打破一誤再誤誤人實誤己也○予湖南陣亡參將張協中祭葬  
世職○庚戌調張集馨署河南按察使由湖北按察使調○辛亥祈穀於  
上帝恭奉宣宗成皇帝配享○王子諭內閣裕誠等奏會同  
傳旨審訊已革大學士賽尙阿並將親供呈遞所有賽尙阿應得  
罪名著原派之大學士軍機大臣會同刑部定擬具奏○諭軍機  
大臣等琦善等奏嚴催未到官兵一摺據奏山西直隸陝西各官  
兵甫經行過許州其漢中陝安甘肅督標兵丁尙未行抵該處卽  
著琦善等飛札嚴催一俟到有成數卽先儘陳金綬帶領迅速馳  
赴安徽察看水陸地方何處緊急卽由何處迎勦如賊匪尙未竄  
出楚境卽由九江或安徽陸路直抵黃州與向榮派出鎮將前後  
夾擊軍情變幻不常陳金綬自能相機進取先其所急琦善已將

先到官兵分布南陽信陽羅山光山商城諸處其在後續到之兵  
日內當亦不少卽著親自統帶迅赴湖北確探賊蹤與向榮密爲  
期會一則專攻漢陽一則專勦武昌兩路同時並舉俾賊匪彼此  
不能兼顧見在向榮已飛調湖南上游船礮駛至金口會合若水  
路乘勢下攻楚賊浮橋船隻兩江水師亦泝流而上迎頭截擊大  
江南北兩岸又有琦善向榮督兵合擊該匪水陸受創前後被攻  
當可聚而殲旃前任吉林副都統富春見在飭赴軍營著琦善派  
令帶隊勦賊其湖北西路尤須防其乘虛竄擾著琦善與向榮豫  
爲準備萬勿疏虞琦善出豫境後南陽有陸應穀信陽有鄭敦謹  
駐紮防守務各嚴飭在事文武實力防堵毋令奸匪一名闖入其  
開封省會重地尤易藏奸卽責成沈兆澐張集馨等專司鎮撫旣  
當固結人心尤須偵緝土匪有人奏河南省曾獲有匪黨究出與

京師奸徒勾結等語未見該撫奏辦此等匪徒一有蹤迹便當嚴究來歷如果牽涉京師尤當密奏查辦豈可稍事遲疑養癰貽患者陸應穀卽查明據實具奏至該撫見在出省信陽及省城如有緊急要事卽著該藩臬等具摺馳奏一面仍稟知該撫庶不至拘泥成例貽誤事機將此由六百里諭知琦善陳金綬陸應穀並傳諭鄭敦謹沈兆澐張集馨知之○向榮奏臣因省城被陷反躬自責寢饋難安十二月二十一日臣派令總兵和春等攻撲新南門派提臣蘇布通阿等攻撲雙峯山長春觀小龜山田家園等處並諭副將瞿騰龍等攻打長虹橋該逆於土城內開放槍礮抵死抗拒時城頭之賊亦用連環大礮轟出礮子密如驟雨廣東署守備薩國亮奮勇爭先搶上小龜山賊營拋擲火罐燒斃賊匪多名猝被賊礮中腦陣亡我兵極力攻打計傷斃賊匪百數十人受傷者

極多復查長春觀以外及新南門沿城一帶俱築有土城與城上之賊相應大礮極多防備甚緊

臣

思該逆占踞武昌漢陽搭有浮橋又有船隻來往此時殲茲醜類必須水陸夾攻方可得手且該逆據取財物極多船內輜重滿載斷不肯舍水就陸是下游之九

江上游之荆襄及岳州回竄之路在在均關緊要昨接署江西撫

臣張芾知會以所調皖豫官兵及三板戰船尙未見到道士洑一

帶兵力過少新任雲貴督臣羅繞典函稱甫於長沙挑選兵勇五

百餘名帶往襄陽堵禦北路一帶雖調有重兵俱未趕到是北走

信陽東下九江西上荊州南回岳州之路俱屬空虛必得上下游

官兵戰船趕到先堵其逃竄之路然後水陸夾攻方可聚殲查隔

江之黃陂縣雙廟驛紮有陝西官兵一千七百名

臣

已疊次知會

該統兵官河州鎮總兵吉順加意固守又查離洪山二三里之卓

刀泉爲東路要隘臣卽移營卓刀泉暫紮惟金口一帶並無船隻  
川兵不能渡江因查上游離省六十里金口爲武漢從西進剿要  
路大兵多於該處採辦糧糈業經咨會提臣蘇布通阿等統帶川  
兵全隊馳往該處扼紮並屬查看情形如須渡江卽速覓船繞往  
北面相機堵勦至賊船較多江面過寬非多撥礮船不能截擊臣  
前擬調長沙常德兵船會擊茲准徐廣緝函知此次官兵仍畱防  
守見調衡永撤回北省官兵管帶礮船駛下攻勦臣昨已飛咨撫  
臣張亮基於長沙一帶雇船三四百號多安大礮委員解至金口  
見札飭張國樑挑選善駕船然礮之捷勇二百名星夜趕到以資  
下擊其下游武昌黃州之賊前有下江南之說難保不仍行東竄  
武昌縣在黃州上游見令總兵郭仁布統帶閩兵一千七百餘名  
馳往防守見在賊踞武漢阻絕南北所有軍行文報難免繞越稽

遲

臣

已飛咨徐廣縉並江西河南兩省按站多備驛馬或添設腰

站以通文報連日查城內潰出官兵飭令各帶兵官速爲收集以資差遣至長沙遣散潮勇一千餘人到營投效聲稱情願殺賊亦飭速爲募齊聽候調遣見查竄擾黃州武昌之賊均已折回省城逆首洪秀泉尙在漢陽楊秀青住武昌羅大綱石達開往來尙無定處其餘韋政胡以洗曾三秀則未聞其人是否被官兵擊斃尙須查探湖北巡撫常大淳署提督雙福總兵王錦繡常祿藩司梁星源臬司瑞元鹽法道王東槐等於城陷時均各殉節其餘在城文武尙多俟查明再行奏報至大營官兵見分禁東路卓刀泉南路長虹橋西路金口爲三路進攻之計又抽撥官兵赴武昌防守上下兼顧城內逃出百姓聲稱逆匪有由水路逃竄之說陸建瀛奉諭飭帶師船會剿久無到信徐廣縉張亮基雇覓船隻亦未見

到深恐貽誤事機倍深焦灼 上諭該大臣見駐卓刀泉並分兵長虹橋金口爲三路進攻之計據稱此時船礮未齊而賊匪屯聚江西攻之過急則東竄之勢愈速自係實在情形向榮見已授爲欽差大臣一切調度不至牽制掣肘著卽飛催上游官兵船礮迅速前來金口乘勢下擊陸建瀛計已泝流上至九江若兩路兵船會剿焚賊船隻輜重斷其浮橋南北兩岸琦善與向榮合兵進剿一攻漢陽一攻武昌水陸互應使賊腹背受敵聚而殲旃在此一举蘇布通阿馬龍等若能渡江繞往北面堵剿更可得力金口地方控扼上游爲糧精軍餉赴營要道尤須妥爲布置勿令梗阻之所稱添設驛站收集潰兵各節均著照所奏辦理潮勇凶悍性成前此遣散既不得法此時必應善爲駕馭萬勿聽其一面之詞倚爲心腹致有勾結情弊所關非細軍情變幻不常該大臣旣膺重

任一切調度朕亦不爲遙制惟須統籌全局斷不可令賊匪紛竄  
鄰境再誤事機省城文武據奏巡撫藩臬道員及署提督總兵均  
已殉節尙未敘明情形著再詳細確查並此外各員及漢陽府黃  
州府武昌縣文武下落一併查明據實具奏將此由六百里諭令  
知之○諭本日向榮馳奏剿賊情形據稱江面過寬賊船較多非  
多撥礮船不能攔江截擊經該大臣行調長沙常德官兵配駕礮  
船駛下金口會擊乃徐廣縉仍以畱防爲詞轉調較遠之衡永撤  
回北省官兵似此不知緩急無怪坐失事機自蹈重罪張亮基見  
署督篆統轄兩省豈可稍分畛域雖湖南防守及剿辦土匪亦需  
兵力而本省存兵及紳士團練儘可藉以自固軍情緊急豈身膺  
疆寄者竟漫無權衡耶向榮見已飭張國樑選善駕船然礮之捷  
勇二百名委頭目管帶其咨取長沙一帶船隻卽著張亮基潘鐸

趕卽封雇三四百號多安大礮委員星夜馳往並節次諭令飭音  
德布韓世禧鄧紹良多雇船隻招募水摸同盧應翔船隻一併迅  
速開行駛至金口聽該大臣調撥見在三路會剿琦善已擬由信  
陽前進陸建瀛計已馳抵九江當此喫緊之際若上游官兵礮船  
稍有遲誤卽江岸兩路夾擊亦難得手必致賊船乘虛順流東下  
毫無牽制下游之兩江水師獨當其衝何以抵禦年來粵楚軍營  
惡習直以賊蹤出境爲了事以畱兵自衛爲得計張亮基目覩覆  
轍經朕屢次誥諭誠諒不至稍存意見也其武昌殉難文武據向榮  
查奏尙未確有實據著張亮基再行確查同漢陽黃州兩郡文武  
一併詳晰查奏將此由六百里諭令知之○癸丑諭內閣本月上

辛 祈穀大祀朕詣 壇齋宿虔申默禱惟願吾民同登衽席永  
戢干戈念自逆匪滋擾以來由廣西而湖南由湖南而湖北所過

城池多被蹂躪見復圍陷武昌省城數萬生靈慘遭荼毒卽未被賊地方亦復聞警遠避備極流離顛沛之苦總由地方官吏平日既不先事豫防臨時又復張皇失措甚至望風先遁以致居民失其所恃不得不轉徙他方以全性命朕爲天下生民主不能察吏安民致令盜賊肆行閭閻驚擾興言及此寢饋難安因思嘉慶年間川楚教匪蔓延數載嗣行堅壁清野之法令民團練保衛旋就蕩平卽今廣西南地方多有團勇保護鄉里賊不敢逼且有殺賊立功者况各處鄉村良民多而莠民少若得公正紳耆董理其事自不至別滋流弊卽地方間有土匪一經約束亦將去邪歸正其保鄉閭惟在良有司素得民心必可收眾志成城之效著各該督撫分飭所屬各就地方情形妥籌辦理並出示剴切曉諭或築塞濬深聯村爲堡或嚴守險隘密拏奸宄無事則各安生業有事

則互衛身家一切經費均歸紳耆掌管不假吏胥之手所有團練壯丁亦不得遠行徵調各團中如有捐貲倡助或殺賊自效者地方官卽申詳大吏據實奏聞朕必立加獎敘如廣西湖南各鄉團出力者無不渥沛恩施凡土著良民各有產業與其倉皇遷徙拋棄田廬轉不免土匪乘機搶掠何如堅守鄉里以子弟衛父兄以家貲保族黨乎至於賊匪夥黨亦豈盡屬凶頑甘心從逆多因被賊裏脅供其役使苟延喘息末由自新見在著名逆匪如蕭潮潰等均已先後殲斃韋政亦伏冥誅惟逆賊洪秀泉楊秀青等尙稽顯戮賊匪惡貫滿盈神人共憤光天化日之下豈容魑魅久肆凶殘必當立就殄除以快人心而安疆圉朕奉行天討軫念窮黎不惜數千萬帑金救民水火見復欽派大臣三路會剿自不難剋期埽蕩惟念此被脅之民不從則先死於賊從之則又死於兵蚩

患何知自罹陷阱古人有云殲厥渠魁脅從罔治朕仰體上天好生之仁何忍概行誅戮如有被賊裹脅自拔來歸者不妨貸其一死有能縛獻首逆或爲內應殺賊立功或戮取長髮賊頭目首級來獻者不但赦其前罪更當加以重賞其各深思猛省毋貽後悔我朝列聖相承深仁厚澤洽於黎庶朕以薄德紹承大統三載以來勤求民瘼惕厲時深雖因各省水旱偏災並南河決口蠲緩錢糧截漕賑濟粵楚被兵處所亦已分別查辦蠲緩加恩而民困未能盡蘇小惠恐難徧及每念生民塗炭撫育無方卽再三引咎自責亦屬虛文惟有恐懼修省叩顙昊蒼宥予之奉拯我窮黎中外文武大臣及地方官吏亦當激發天良爲民除害各省紳民人等自必同仇敵愾速殄妖氛從此永慶綏豐仰承天佑朕與天下臣民同深寅感茲值大祀禮成用是敷布朕懷重申誕

告著該部及各直省大吏刊刻謄黃宣示中外咸使聞知○諭軍  
機大臣等昨據向榮奏武昌城內逃出百姓聲稱逆匪已將城內  
大礮扛擡上船其被脅男婦紛紛驅至船上有水路逃竄之說本  
日又據陸應穀奏探聞賊在武昌過年後卽分三路東下水陸並  
進犯安慶江甯二處並欲截瓜州水口糧船招集豐北饑民見賊  
約四五萬能打仗者萬餘各等語自賊踞武昌以來屢次諭令陸  
建瀛督帶大兵泝流追剿該大臣此時是否已抵九江水陸要隘  
如何布置尙未奏報朕心甚爲焦急逆匪蓄謀已久若一日順流  
東下九江首當其衝該大臣馳抵該處務須與張芾妥速籌備並  
知照向榮所調湖南上游船礮由金口駛下與江省水師會合夾  
擊其陸路各要隘亦須督飭帶兵各鎮將等確探賊蹤迎擊兜剿  
兌在向榮派郭仁布帶領閩兵前往應援陳金綬亦自河南帶兵

從安徽一路繞出賊前若水陸聲勢聯絡賊匪定難飛越皖省地方多與楚境毗連賊氣迫近情形喫緊江甯雖處下游一水直達該撫等亟須嚴密堵截擇要設防尤以固人心戢內奸爲要小孤山爲皖省險隘東西梁山等處亦金陵鎖鑰分兵扼守均屬緊要毋得各存畛域致誤事機楊文定見駐江甯其江蘇省城事宜著聯英倪良耀就近商辦如有緊急要件該藩臬卽行具摺馳奏一面稟知該督撫庶不至拘泥遲誤前諭李德飭令水師船勇駛往江南備調茲據奏稱黃富興前已赴粵見在飛咨登州鎮挑派驍勇兵丁四百名派幹練備弁管駕船隻剋日浮海南下以資江口防勦並稱上海一帶向有廣艇及水勇可雇其運用火器尤爲便捷著楊文定卽飭上海道吳健彰體察情形如何得力卽著迅速籌辦鎮江瓜州爲南北水路咽喉斷不可稍有阻隔總之軍務情

形變幻靡定全在該大臣等相機設法以備不虞賊匪竄擾楚粵  
吾民被害已甚儻復任其闖入江境肆行滋擾朕惟該大臣等是  
問將此由六百里諭知陸建瀛楊文定蔣文慶張芾並諭知祥厚  
等傳諭祁宿藻聯英倪良燿知之○免廣西元年緩徵額賦十分  
之五永安等十五州縣二年額賦十分之三○甲寅諭內閣國家  
設立營伍稽查奸宄捍衛地方必當隨時整頓方能有備無患京  
師重地尤關緊要朕聞步營兵數多不足額街道堆撥往往雇夫  
充數該管官巡查明知不究似此上下相蒙尙安望禁暴詰奸緩  
急可用著步軍統領徹底清查嚴懲頂替甄汰老弱挑選精壯務  
令兵歸實用餉不虛糜至禁城內外各門尤宜嚴肅節經降旨令  
前鋒統領護軍統領嚴飭值班官員兵丁等隨時查覈第輪班值  
宿人數眾多其中難保無曠誤偷安老弱充數著該管大臣認真

揀派以資宿衛並隨時查驗軍器務使一律堅利毋得徒飾觀瞻  
九城內外地面五方雜處其小街僻巷及民房寺院客店等處最  
易藏奸著步軍統領衙門順天府五城一體嚴密偵緝遇有形迹  
可疑行蹤詭祕者立即盤詰究辦務使奸宄歛迹地方肅清毋得  
視爲具文致干重咎懷之○諭勞崇光奏拏獲糾眾拜會匪徒嚴  
行懲辦一摺廣西全州興安交界五排地方匪徒楊三通等膽敢  
於逆匪竄撲長沙之時刦立孝義會名目邀集多人歃血盟誓妄  
立五營頭目暗號意圖乘機焚劫經各州縣訪聞密稟該撫派委  
太平府知府顧諧庚馳抵大溶江地方督飭文武紳團不動聲色  
將首要各犯全行拏獲正法辦理尙爲妥速所有該州縣文武失  
察處分均著加恩寬免仍飭該地方官督率兵壯團練嚴搜餘匪  
毋得稍畱餘孽以靖閭閻○諭軍機大臣等陸應穀奏湖北襄陽

府屬北鄉一帶土匪滋擾旱路新集煙家店等處係郭大安董如  
林易有道等爲首夥匪一千三四百人拒傷兵勇奪去大礮四尊  
水路董家埠古城營等處匪首孫貴樂玉石劉見瀾劉子槐等聚  
眾一千六七百人搶劫商船三百餘隻製有黃旗紅袍擡槍大礮  
等件該處與河南新野縣連界已派總兵柏山帶兵馳赴新野會  
同襄陽府嚴密勦擒等語土匪乘間竊發必應及早殲除見在河  
南前往之兵止一千餘名恐尙不敷勦捕著舒興阿卽遴派得力  
文武大員酌帶弁兵馳赴襄陽會同河南官兵迅速兜勦務將首  
夥匪犯悉數殲擒毋畱餘孽其商州等處通楚各路徑著一律嚴  
防勿任偷越羅繞典計已遵旨馳赴襄陽並著舒興阿知照籌商  
妥速辦理不得稍存畛域之見致誤事機將此由六百里諭令知  
之○諭陸應穀奏襄陽土匪滋擾見派鎮將督兵合勦一摺該匪

等膽敢因武昌失守糾眾搶奪抗拒官兵不法已極陸應穀不分畛域派兵會擊自應如此辦理本日已寄諭陝甘總督舒興阿迅速派委得力將弁星速馳往該處協力擒擊惟陝甘兵到尚需時日襄陽界連陝豫地據上游最爲緊要前有旨令羅繞典馳往駐紮兵力尙單若不急將土匪撲滅恐滋勾結爲患著向榮悉力籌畫是否能暫爲分兵前往會剿儻因武昌一帶賊勢緊急卽飛咨陝西河南併力勦辦刻下武漢逆賊蹤迹如何前調湖南船礮何時駛到金口儻該逆等乘武昌漢陽全股順流東下兩江情形關繫緊要向榮必當統領大兵跟蹤追剿斷不可稍有延緩若賊畱餘匪牽制我兵而以大股潛入江境亦須察看緩急酌畱官兵在楚仍當督率重兵水陸緊追使賊匪無暇喘息與九江安徽江南等處官兵前後夾擊賊匪進不得攻城肆掠退有大軍緊躡其後

勦辦庶可得力從前粵楚失計賊來不能堵截賊竄又無能力追向榮深知其弊豈可自蹈覆轍該大臣軍營有無文員襄辦文案案如有應行調用之人卽著一面奏明一面調營差委又據陸應穀奏稱聞賊匪於上年十二月十三日前往黃州知府副將豫行遷避以官兵作稱百姓誘賊入城設席送酒賊匪飲醉被官兵盡行殺戮後數日賊來復仇行至郭店向榮派兵趕到復獲勝仗又賊分股至蔡店向民人逼索錢穀滿載欲行又經我兵截殺奪回錢穀各等語河南探報虛實難憑仍著向榮確查並隨時將賊匪情形具奏將此由六百里諭令知之○廣西巡撫勞崇光奏伏查逆匪起於粵西金田新墟等處旣而踞永安撲省城由興安全州闖入楚省該逆等每遇移巢皆盡族以行經官兵跟蹤殲斃不少見在似無該逆家屬在粵藏匿臣屢飭地方嚴密搜捕並無蹤迹惟

下游一帶大兵攻勦得手賊勢窮蹙難保不回竄舊巢

臣惟有懸

賞購綫設法辦理並諭地方編查保甲諱飭界連楚省各屬扼要

嚴防至洪秀泉籍隸廣東花縣其祖父墳墓在該縣松岡嶺弔鐘

形等處上年已據花縣知縣牛洪齡查明與馮雲山祖父墳墓一

併空掘並拘獲馮雲山家屬解省審辦又韋政之曾祖韋彩葬於

金田亦經前署桂平縣李孟羣查明發掘其餘各孽種墳墓容再

確查發掘以除戾氣再逆匪范運得家屬前經拏獲正法至各處

土匪並當趕緊分投埽捕以期一律肅清奏入報聞○乙卯 上

御紫光閣賜蒙古王公外藩使臣等宴

有差每歲皆如之○

向榮奏連日查探逆匪糧缺知其日內必逃當於十二月三十日

夜傳派各營於正月初一日分路進攻

臣

督兵勇奮力驟擊賊眾

敗潰都司張國樑乘勢攻入賊營立將土城拆毀十餘丈奪獲六

百斤大礮二尊器械二十餘件據城內百姓逃出聲稱該逆將大  
礮紛紛搬入船內從上游走荊州並分股回竄長沙復據探報賊  
船二百餘隻駛至上游離漢陽三十餘里之沌口地方隨後尚有  
賊船陸續揚帆而上等語查沌口係通荊州小河當卽飛咨駐紮  
金口之提臣蘇布通阿畱心偵探如賊上竄卽速跟蹤追擊一面  
飛調防守常德之總兵音德布趕往荊州會同將軍台湧責力堵  
勦但恐該逆聲東擊西故作逃竄之計下游之道士洑兵力尙單  
卽於初二日派令總兵王山參將劉開泰管帶兵勇馳往會同該  
處官兵扼要堵截初二日夜見保安大東門一帶火起刻卽出隊  
進攻派令總兵和春秦定三從後進襲臣率總兵李瑞等分攻東  
南二門兵勇直抵城門該逆不敢抵抗紛紛下城逃竄我軍一擁  
而入分投趕殺該逆由草湖門漢陽門逃出擁擠上船我軍追抵

江邊殲斃賊匪多名餘賊撲水淹斃者無數當將武昌省城收復  
查探頭隊賊船二百餘隻昨夜已駛下離省六十里之陽邏地方  
其餘尙在北岸一帶停泊臣已派令總兵和春李瑞秦定三帶兵  
先由南岸沿江追擊臣見將應辦事件妥爲料理卽日督隊緊躡  
賊蹤相機督辦一面飛咨琦善派兵繞出江南上游會同圍剿並  
否陸建瀛張芾迅帶師船從江中攔擊及照會玉山劉開泰限以  
五日趕到九江會同堵剿省城收復一切需人料理臣急須督兵  
追擊不能兼顧查河南布政使嚴正基見在岳州辦理轉運糧局  
已照會該員速來武昌查辦一面飛咨調任湖北撫臣駱秉章趕  
緊前來以資表率 上諭內閣見在收復武昌省城賊船已駛往  
漢鎮下及離省六十里之陽邏地方向榮一面畱兵在省彈壓防  
守卽親督諸軍緊躡賊蹤追擊繞截辦理甚合機宜著卽督率總

兵和春李瑞秦定三等分帶各路兵勇水陸並下乘賊勢竄逃之餘迅速追勦毋令會合併力東駛至武昌城內文武殉難人民慘遭荼毒亟應大員前往撫綏招集流亡著張亮基駱秉章卽日兼程馳赴武昌並著河南藩司嚴正基自岳州先行馳往將被難居民加意撫恤戕害屍骸分別查認收殮並將武昌漢陽殉節文武官員迅速詳查被害各情節卽行馳奏其漢陽城中賊匪是否全行逃竄著見在駐紮黃陂之總兵吉順先行帶兵前往收復前已諭令陳金綬帶兵由安徽一路繞出賊前截擊琦善著卽日統兵與向榮兩路合力追勦陸建瀛統領江省水陸重兵迎頭夾擊毋任賊匪東竄並著張芾蔣文慶楊文定等一體飭屬嚴密防堵毋得稍有疏虞○諭軍機大臣等向榮奏賊匪被擊下竄一摺賊匪占踞武昌漢陽經該大臣派委兵勇分路進擊逆匪紛紛逃竄我

軍收復武昌省城見在頭隊賊船二百餘隻已駛下陽邏地方該  
大臣先派玉山劉開泰等管帶兵勇馳往下游道士洑會同該處  
官兵戰船扼要截堵並令和春李瑞秦定三統帶官兵沿江追擊  
布置尙屬妥協著卽相機進攻與琦善陸建瀛三面會剿賊匪銀  
糧輜重盡在船中若能設法燒毀勦辦更易得手前調湖南船礮  
此時是否調到已屢次嚴諭張亮基等籌辦矣蘇布通阿等所帶  
官兵若由金口乘船下擊必可得力仍須隨時知照陳金綬兩路  
夾攻江省兵力太單惟藉南北兩路合勦向榮統籌全局諒必能  
先其所急也本日軍機大臣奏有人呈稱賊匪擄船甚多宜用火  
攻見雖竄出武昌而東駛船隻攢聚江面正可相度地勢乘風縱  
火燒毀賊船或設伏用間或選派心腹弁兵溷入賊中相機行事  
或募水摸鑿沈賊船惟在隨時酌辦朕亦不爲遙制原呈著摘鈔

閱看該大臣久歷戎行於見在軍營中將弁自必知之最悉如有  
才技出眾有勇有謀者著卽據實奏明以備錄用此外若有素所  
深知堪備將材者無論何省營弁一併保奏慎密爲要將此由六  
百里加緊諭令知之○諭向榮奏賊匪被擊下竄見督諸軍追勦  
一摺據稱頭隊賊船已駛下陽邇地方距道士洑二百餘里陸建  
瀛已抵九江著卽督帶兵勇並水陸得力將弁迎頭截擊遏其直  
下之路與向榮琦善等分路夾攻互爲犄角不可再令紛竄所帶  
馬礮六百尊前有旨諭令妥爲布置此項利器必須得力將弁管  
帶萬不可稍有疏失並著張芾蔣文慶嚴密守禦互爲接應江甯  
省城緊要屢經降旨令祥厚楊文定等扼要防守本日復諭令楊  
殿邦楊文定於鎮江瓜州一帶派兵守禦兩處江口關繫南北全  
局斷不可使賊搶占致有梗阻江岸上游亦須密爲布置務期聲

勢聯絡互爲策應本日軍機大臣奏有人呈稱賊匪據船甚多宜用火攻見在賊已竄出武昌其銀糧輜重盡在船中若於沿江港汊豫伏船隻多備火器於賊船攢聚之處乘風縱火燒毀自不難奪其所恃如能設法計誘或密選心腹將弁改裝潛入賊營或募水摸鑿船使沈惟在相機設法不可拘泥至廣艇是否可用已有旨諭令楊文定飭令吳健彰酌辦本日又有人奏上海見在廣東艇船不下百餘號客商覓雇專爲護送貨船若雇令由崇明入京口可禦上游下竄之賊惟船夫皆澳門人又係夷裝是否可以雇用不至別滋事端仍著妥速籌辦原摺呈著摘鈔給閱將此由六百里加緊各諭令知之○諭本日據向榮奏逆匪竄出武昌勢將東下一摺鎮江瓜州爲大江南北咽喉重地漕糧運道文報往來在在均閑緊要其爲東南門戶較之武昌漢陽尤爲喫緊見在楊

文定駐守江甯省城楊殷邦計已行抵淮安著卽就近馳赴瓜州  
江口扼要駐紮督同兩淮運司劉良駒常鎮道姚熊飛鎮江揚州  
各知府並會同京口副都統相機妥爲布置前任運司但明倫於  
揚州地方素爲熟悉著卽畱於該處隨同楊殷邦等協力防守前  
有旨諭令陸建瀛等調撥崇明狼山福山等處水師爲省城聲援  
是否業經調到提督福珠洪阿是否已帶兵前來瓜州京口兩處  
止有漕標及京口協水師兵丁可資調遣恐兵力不敷則徐州鎮  
標弁兵亦可酌量緩急調撥儀徵鹽船及夫役人等如有可用之  
處並著酌量雇募以爲團練防守之助該漕督務須體察情形迅  
速籌辦勿致稍有疏失陸建瀛相距較遠著卽與楊文定隨時酌  
辦不可稍分畛域將此由六百里加緊諭令知之○諭武昌逆匪  
經向榮於正月初一日派兵四路進攻初二日逃竄出城擁搶上

船至離城六十里之陽邏地方停泊下游情形危急全賴北路重  
兵星馳截勦與向榮南路追兵勢成犄角以遏其鋒儻株守信陽  
專以帶兵未齊藉口必致貽誤事機琦善接到此旨卽刻兼程帶  
兵前進乘賊匪甫經逃逸相機追勦一面嚴飭得力鎮將管帶兵  
勇於江南北岸沿途截追可期得手至武昌收復本日已諭令張  
亮基駱秉章等馳往撫綏難民若漢陽賊匪亦全數竄出著吉順  
就近收復交張亮基等妥爲安集琦善應卽統兵與向榮會籌合  
勦迅速前進斷不可以收復漢陽爲詞在彼遲留至賊船見處下  
游當以火攻爲要著該大臣體察形勢酌量密辦儻經朕諄諄訓  
誠琦善陳金綬仍不迅速遵辦致賊匪闖入九江宿松順流下駛  
朕必治以遷延貽誤之罪陳金綬久歷行陣於將弁中實在謀勇  
出眾或一技之長有可資委任者准其據實保奏候朕錄用琦善

赴楚後河南防堵事宜陸應穀督同地方官嚴密布置勿稍疏懈至襄陽土匪滋事派兵會剿見在曾否撲滅並著該撫隨時據實奏聞將此由六百里加緊各諭令知之○丙辰諭內閣布彥泰奏審明葉爾羌阿奇木伯克稟詳該管大臣定擬具奏一摺此案乾清門行走回子郡王葉爾羌三品阿克木伯克愛瑪特於所屬護衛阿渾挾勢婪贓毫無覺察又以該管之參贊幫辦大臣偏認攤派路費畏罪情急列款訐控實屬咎無可辭愛瑪特著退出乾清門革去阿奇木伯克姑念伊父伊薩克擒獲張格爾有功著仍留王爵發交伊犁將軍差遣以觀後效葉爾羌參贊大臣德齡幫辦大臣倭仁風聞該伯克攤派路費及護衛阿渾索贓等情並未查訊明確卽行參奏辦理殊未允當德齡倭仁均著交部嚴加議處尋議降三級調用從之○命戶部左侍郎王慶雲倉場侍郎慶祺

往天津驗收海運漕糧○以審辦葉爾羌控案出力釋遣成新疆  
已革湖南巡撫馮德馨回籍○丁巳諭內閣怡良王懿德奏請將  
各處未補倉穀暫緩採買一摺福建省城及漳州府屬上年夏間  
猝遭風雨民間益減雜糧閒有損失兼之臺灣米船進口稀少晚  
收後糧價未見平減若再發價採買倉穀誠恐有妨民食著照所  
請准將上年應補倉穀暫緩採買俟今秋晚收後糧價平減再行  
奏明買補其厯年未買竣穀五萬八百餘石仍著責成該管道府  
勒限買竣以重倉儲○諭軍機大臣等有人呈稱置備船礮撥兵  
防守江口十二條昨據向榮奏逆匪下竄賊船已駛下陽邇地方  
距道士洑二百餘里大江下游一帶不可不嚴密防守昨已諭令  
楊殿邦楊文定等於鎮江瓜州兩處江口派兵防守並於沿江港  
汊多伏船隻豫備火器燒毀賊船並雇水摸將賊船鑿沈亦可奪

其所恃該漕督等自己設法相機籌辦江面船隻急應收用金山  
爲南北兩口要隘必應重兵屯守安礮設防其餘各隘口均須嚴  
密防備著該督等卽將所奏各條體察情形迅速籌辦但須因地  
制宜亦不必拘定如此辦法原單著鈔給閱看又有人奏鎮江一  
帶多有善泅者能於水中潛伏數日俗名水葫蘆亦可雇募備用  
見在賊匪東竄江口要隘關繫南北全局斷不可使賊匪搶占致  
有梗阻設防處所尤應慎擇將弁管帶兵丁守護船礮木簰毋稍  
疏虞陸建瀛見在督兵九江上游相距較遠卽著楊殿邦楊文定  
妥速籌辦無致延誤前任江南河道總督潘錫恩見在告病家居  
著傳知該員幫同辦理地方防堵事宜所需經費若俟部撥緩不  
濟急或截畱漕糧抵用或於鹽務地方紳商設法捐貸暫濟急需  
將此由六百里加緊諭知陸建瀛楊殿邦楊文定並諭祥厚霍隆

武文藝傳諭祁宿藻聯英倪良燿劉良駒但明倫知之○戊午諭  
內閣見在軍務未竣部撥各省軍餉經過地方必應迅速催解大  
營以資接濟即使道途間有阻隔亦當設法籌運繞道行走妥速  
解交若因本省需用孔亟將過境餉銀紛紛截留是但圖自便取  
攜置大營要需於不顧儻有貽誤所關非細卽如蔣文慶奏浙江  
委解湖南湖北餉銀七萬兩因驛路難行請畱皖省作爲防堵經  
費朕以該省見在防堵情形較前緊急姑允所請惟該撫摺內並  
未籌及繞道行走於大營需用緊要應請補撥之處亦竟未置一  
詞封疆大吏自應統籌全局豈不知部撥軍餉斷難展轉稽延耶  
嗣後各督撫務當先其所急於餉銀解經本境趕卽派委妥員護  
送並飭該員等探明路徑如須繞越前進卽加意防護迅解大營  
毋稍疏失儻各存畛域任意截畱要餉致誤事機著該部卽行參

奏○諭軍機大臣等前據季芝昌王懿德奏參福建水師提督鄭高祥督勦艇匪畏葸不前當降旨照部議革職仍責令帶罪出洋勦捕以觀後效朕見聞閩省洋面廣艇匪徒愈肆滋擾臺灣米船間被搶掠以致臺米不能渡海閩浙糧價增昂鄭高祥不能乘坐海船每遇巡洋往往藏匿海汊逾時捏報欺飾似此怯懦無能無怪匪徒日肆且江浙二省見辦海運設使洋面稍有疏虞所關非細著怡良王懿德迅卽確查鄭高祥如有前項情節不勝水師之任卽行據實參奏另派妥員暫署一面奏請簡放務飭署任之員將艇匪悉數殲除毋得再有貽誤陸路提督炳文前據季芝昌等奏署遊擊王煜申文內夾有匿名揭帖聲訴炳文有調操扣餉各情該提督平日聲名究竟若何著一併查明具奏並著閩浙督撫於水師各營總兵內畱心訪察如有堪勝水師提督之任者據實

保奏再前據黃宗漢奏浙江提督葉紹春艱於步履擬請總督代奏開缺朕知該提督熟習海面情形平日整頓營務尙屬認真見當勦捕廣艇匪徒之際統率需人著黃宗漢就近查看如該提督病已痊愈卽傳旨令其奮勉從公以圖報效毋負委任將此各諭令知之○己未命恭親王奕訢詣 慕陵行三期祭禮 上詣奉先殿 壽皇殿行禮○頒 珠筆訓臣工戒因循諭曰我 皇考宣宗成皇帝深仁厚澤浹於寰宇予小子受付託之重懷大業之艱兢兢業業已三年矣追思我 皇考彌留之際諄諄以國計民生爲重顧命諸臣所共知者試思今日國計未豐民遭塗炭朕雖自恨自責竭力籌維亦終無成效豈不有負 高深爲天下一罪人乎內外文武諸臣抒忠宣力視國如家者固不乏人然泄泄沓沓因循不振祿位之念重置國事於不問者正復不少朕雖非

賢主斷不忍諉咎於諸臣試問諸臣五夜捫心何忍何安若不痛  
加改悔將來有不堪設想者矣是用誕告爾大小臣工自今日始  
仍有不改積習置此諭於不顧者朕必執法從嚴懲辦斷不姑容  
猛以濟寬正今日之急務也朕爲諸臣計國計民生無關於汝之  
身家獨不惜一身名節甘爲大清國不忠之臣不亦愚乎總之以  
言惑人其惑甚淺爾大小臣工若以認真爲多事以朕爲可欺一  
人在上欺之固易翹首 上蒼昭昭 明鑒吁可畏也特諭○諭  
軍機大臣等戶部奏遵議楚省餉糧一摺已有旨交向榮張亮基  
等照辦矣至所稱截畱米石作爲軍食一節前經飭令該督撫等  
籌辦惟江甯等屬及安徽江西應運新漕除截畱軍食外爲數尚  
多儻因運道梗塞未能抵京自應酌量變通以應運米石抵各該  
省兵餉銀兩且可節省漕項津貼等款著陸建瀛楊殿邦楊文定

蔣文肅張芾等迅速覈計所有業經徵收之漕糧若干見歸節省之漕項若干應如何搭放兵餉或就地糴變務卽通盤籌畫奏明辦理至大兵追勦所在口糧遇有漕地方亦命其隨地關支以抵銀兩其節省之銀統歸軍需報銷該督撫等身膺重任當此軍務喫緊經費支絀之時其各體察情形妥速辦理至漕船水手均係壯丁見旣停運是否可招募團練以資禦侮有無流弊並著酌量辦理將此由六百里各諭令知之○庚申 上御保和殿賜王大臣官員蒙古王公外藩使臣等宴○諭軍機大臣等祥厚楊文定霍隆武奏省城守禦情形並懇添調勁旅一摺江甯省城保障東南節經降旨令該將軍等督兵守禦茲據奏稱江南兵力柔脆提標各營又節經徵調福珠洪阿於城外設防尙覺勢孤復由霍隆武選帶旗兵總兵程三光選帶營兵擇要駐紮與該提督互爲犄

角布置尙屬周妥惟城內兵力單弱自係實在情形所請山東精兵已有旨令李德卽選精兵二千派委得力將弁管帶馳赴江甯以資調遣其山東師船旣據稱緩不濟急已諭令停其調往矣前已有旨諭令楊殿邦督同運司道府並會同文藝籌辦江防事宜又諭令將前任運司但明倫畱於揚州等處辦理防堵茲據奏稱揚州鎮江兩郡經文藝暨該運司督同府縣辦理著卽趕緊布置無稍延緩至所稱開挖城濠築壘蓄水擇要挑空並多設地聽及城上架礮諸事著卽飭令祁宿藻涂文鈞等與鄒鳴鶴迅速妥辦總期通盤籌畫進可以戰退可以守不至臨事倉皇是爲至要將此由六百里諭知祥厚楊文定霍隆武文藝並諭福珠洪阿傳諭祁宿藻鄒鳴鶴各知之○辛酉諭軍機大臣等見在賊由武昌東竄大兵追剿需餉孔殷各省撥解餉銀恐因驛路阻隔致有稽延

惟自廣東至湖北轉運較便上年十二月曾諭令葉名琛等籌款接濟仍著迅速設法無論庫款關稅各項先行籌撥派委得力員弁妥速解赴大營應用或於廣東殷實商戶暫行借貸以期有益要需刻下向榮統帶重兵由武昌陸路跟蹤追勦九江下游情形萬分喫緊若停兵待餉其勢更不可問諒該督等必同此焦灼也將此由六百里加緊諭知葉名琛柏貴並傳諭曾維知之○諭張亮基奏籌撥湖北軍餉各摺片已飭戶部速議具奏並諭令葉名琛等趕緊籌款接濟矣逆匪竄出武昌全行上船在江面陽邏一帶屯泊如果上游船礮應手正可乘此順流焚勦據徐廣縉奏見已酌撥礮位多備船隻又添置漁船雇募水摸業經派定交付鮑起豹管帶一俟船礮到齊卽與續置火船押往金口著張亮基仍遵前旨迅速辦理聽候欽差大臣向榮調撥至軍餉一節尤關緊

要朕已據戶部奏明開單飛咨各省並有旨諭令向榮張亮基等  
按單催提惟各處道路梗塞恐委解各員繞越行走不免耽延時  
日朕心實深焦灼著張亮基等先行就近設法籌畫或於本省富  
戶商賈暫爲借貸或將應存米糧運赴軍營以資接濟務須通盤  
籌畫先其所急若但以軍餉不繼一奏了事展轉稽延恐致貽誤  
武昌省城今已收復前諭令張亮基駱秉章卽日馳往見在招集  
流亡撫綏難民彈壓土匪一切均須妥辦武昌餉銀究被賊匪掠  
去若干該署督等到省後是否尚可稽查著卽一併具奏飛咨戶  
部查照再襄陽土匪滋事此時是否肅清仍當隨時知照羅繞典  
籌商勦辦立淨根株湖南防勦各事宜卽責成潘鐸相機妥籌毋  
得稍有疏虞將此由六百里加緊各諭令知之○安徽巡撫蔣文  
慶奏臣奉旨令周天爵協同辦理團練防勦事宜並飭陳金綬帶

兵數千往安徽幫同截擊查周天爵練勇尚需時日陳金綬不知行抵何處已咨催迅卽來皖日內山東官兵八百名江蘇官兵九百名陸續到省省垣聲勢漸壯人心較前漸定除附城安置繁營並城上按垛派兵外當卽分撥兵丁七百名交浙江副將田大武遊擊孫國安帶赴宿松會同防堵又撥兵三百名前赴小孤山交臬司張熙宇督令協同防勦此外英山霍山太湖各要隘擬俟續有兵到再爲分布報聞○壬戌 上御乾清宮賜近支親藩等宴○諭內閣理藩院奏杜爾伯特扎薩克和碩親王棍布扎布見當軍務未竣情願將所領俸銀二千兩捐備軍需懇請轉奏一摺杜爾伯特扎薩克和碩親王棍布扎布聞軍務未竣情願捐輸俸銀二千兩實屬出於至誠朕甚嘉悅惟念該親王平日藉資嘗差所捐銀兩著勿庸賞收加恩著賞給大卷紬袍褂料一套由廣儲司

支給以示朕體恤蒙古臣僕之至意○諭理藩院奏駐京之科爾沁鎮國公棍楚克林沁見當軍務未竣情願捐銀一千兩以備軍需懇請轉奏一摺科爾沁鎮國公棍楚克林沁捐銀一千兩以備軍需具見惄忱此項捐輸銀兩著卽賞收交軍機處存記俟軍務告竣再行提奏○諭軍機大臣等有人奏訪聞逆賊見用木簰舟行中流簰行傍岸上堆泥塈槍礮遞列四面直若無基之城有足之馬結陣而行戰船不能及前火攻不能透內又有連環小簰一遇敵軍可以圍裹又用木簰鋪板上覆厚土接連兩岸可以遮遏上游之師若坦途然以利行旅凡過者皆以銀錢與之如此則川江漢江之兵米不能踰越鐵銅等船必被格斷賊如順流東下衝過九江安徽江南各處雖有小隘口恐難抵禦賊若水陸並下以遏江西兩廣兩湖之兵則江甯勢甚可危揚州以北亦恐震動今

止有屯重兵於鳳宿徐州上下四面救應如賊竄至江甯則以重  
兵扼瓜州或泝流到觀音門以木簰厚塞使不能下則布置可期  
得手等語若如所奏賊匪木簰笨重若我軍船礮應手正可順風  
縱火焚毀賊船向榮此時已督兵追趕下游陸建瀛見在如何禦  
賊琦善陳金綬是否帶兵由北路趕緊追勦旬日以來均未據奏  
報實深焦灼凡遇江口勿令賊匪占踞其船隻必須先期收入港  
汊多備火具繞出賊船上游乘勢焚擊陸路扼要處所萬不可令  
賊截斷總期通盤籌畫進可以戰退可以守是爲至要又有人奏  
軍營應明定賞格如有斬獲首逆者無論官兵軍民人等必應加  
以鉅萬重賞卽爵職之榮亦所不靳著該大臣等明定條款徧行  
曉諭重賞之下必有勇夫朕斷不爲遙制也將此由六百里加緊  
各諭令知之

癸亥諭內閣本日張亮基奏據實舉劾州縣一摺

已有旨准照所請分別辦理矣所劾呂裕安陳敬曾各員或才品  
猥下或居心汚鄙自應隨時糾參以肅吏治惟封疆大吏爲屬員  
標準表正景正不易之理此等劣員總由歷任各上司喜其揣摩  
迎合曲爲徇庇以致吏治廢弛養癱貽患實堪痛恨卽如程喬采  
身任湖廣總督辦理地方防堵毫無布置任賊肆竄斥革後仍令  
畱辦糧臺效力贖罪該革員受朕格外恩施宜如何力圖後效乃  
以武昌失守眷屬存亡未卜驚憂成疾爲詞懇回本籍調理而張  
亮基卽代爲具奏乞恩夫人臣國爾忘家豈宜巧便身圖置公事  
於不顧况當軍務萬分喫緊惟知引疾規避冀得脫身事外是誠  
何心且如常大淳等以身殉國甚或全家被難情形極爲可慘以  
該革員較之尙得遂其倖生苟免之私而顧恝然求去耶前者朕  
聞其向該署督告病呈詞居心鄙陋業已灼見肺肝特以糧臺責

任重大該革員既已喪盡天良畱之亦屬無益姑允代奏飭令回籍而張亮基前次奏片代陳患病情形反復覲縷惟恐不邀允准且稱該革員除隨身行李外一切存在武昌均已蕩然當此垂暮之年未免益增心累等語張亮基但欲見好同官並以代爲計及瑣屑之語直達朕前如果心地純淨無私此等鄙言何至流露筆端朕不欲過事吹求而諸臣之設心行己誠僞公私殆亦難逃朕鑒偶因張亮基此奏特加訓誡俾咸知儆省至督撫職司舉劾察吏所以安民而在此時尤爲急務除湖南湖北省各員仍著張亮基等隨時認真甄別外各直省督撫務須破除情面嚴加查察如有貪鄙不職之員一經訪聞立即據實嚴參重懲不准稍存姑息任令昏庸戀棧致釀亂階其道府州縣各官實有循聲素著才猷卓越者卽當登諸薦牘或實心任事悃幅無華不染卑鄙惡習者

亦當拔尤保舉以挽頽風各該督撫等經朕簡畀封疆重任其各正身率下舉錯公明當此時勢孔艱需才尤亟若不激發天良屏除成見將所屬各員實力甄別舉劾何以振紀綱而蘇民困耶將此通諭知之○諭軍機大臣等武昌賊匪東竄據向榮奏報已屆旬日賊蹤見由何處抑仍在黃州上游之陽邏地方屯聚未據續行奏到陸建瀛計抵九江將屆兩旬是否已經往上迎擊與向榮所派玉山劉開泰管帶廣東兵勇合力堵勦截賊下竄之路亦未據該大臣奏聞朕心日深懸念九江爲蘇皖各省門戶關繫十分緊要本日據浙江學政萬青藜奏稱該處上游北岸黃州武穴鎮南岸瑞昌馬頭係江廣咽喉須重兵防堵九江城西龍開河地面得勁兵駐守可與瑞昌馬頭接應並將河口挑空寬深以所挑之土堆高基址堅築土城與郡城犄角以障衛陸兵而遷駐水師更

於黃梅之新開鎮小池口等處扼要築堡防賊偷渡卽與武穴鎮沿江接應賊匪四面受敵必不敢徑犯長江等語該學政籍隸九江熟習該處地方形勢險要所奏不爲無見不知該處是否如此布置此時情形又復如何著陸建瀛張芾會同向榮迅速籌辦一面知照湖北督撫一體辦理並將見在防勦情形迅速具奏原片著鈔給閱看將此由六百里加緊諭知陸建瀛張芾並諭向榮知之○前禮部侍郎曾國藩奏臣遵旨幫辦團練查匪事務於上年十二月二十一日馳抵省城與撫臣面商一切因念團練之難不難於操習武藝而難於捐集經費若經理非人易滋擾累臣此次擬訪求各州縣公正紳耆勸使董理其事俾百姓知自衛之樂不復以捐貲爲苦至搜查土匪撫臣張亮基業經嚴飭各州縣設法辦理惟逆燄旣熾長沙重地不可不嚴爲防守臣察看省城兵力

單薄詢悉湖南各標兵丁多半調赴大營行伍空虛不足以資守禦因於省城立一大團練局認真操練就各縣曾經訓練之鄉民擇其壯健而樸實者招募來省念自軍興以來二年有餘時日不爲不久糜餉不爲不多調集大兵不爲不眾而往往見賊逃潰未聞有與之鏖戰一場關頭一戰者其所用兵器皆以大礮鳥槍遠遠轟擊未聞有短兵相接者皆由所用之兵未經練習無膽無藝故所向退怯今欲改絃更張總宜以練兵爲要臣擬見在訓練章程宜參倣前明戚繼光近人傅鼐成法但求其精不求其多但求其濟不求速效誠能實力操練於本境土匪足資勦捕卽於省城防守亦不無裨益 上諭曾國藩奏幫辦團練查緝土匪情形另片稱俟有頭緒卽當回籍守制等語見在楚省土匪查緝尙未淨盡各處團練保衛鄉閭最關緊要該侍郎所奏訓練章程宜倣成

法但求其精不求其多既可防守省垣復可查拏土匪辦理甚爲妥協著張亮基潘鐸會同該侍郎悉心籌辦毋任有司視爲具文曾國藩係丁憂在籍大員奉旨幫同地方辦理團練事宜原爲保衛桑梓所請不敢仰希恩敘並縷陳各情具見悃忱惟當此設團訓練勑捐籌辦之時必須公正紳士素爲鄉里信服者會同地方大吏始終其事庶克有濟曾國藩籍隸湘鄉距省不遠卽幫辦公事亦於定省不至疏闊著俟辦理著有成效再行具奏遵例回籍守制可也將此諭知張亮基潘鐸並諭曾國藩知之○甲子 上  
御撫辰殿賜王大臣官員蒙古王公外藩使臣等宴○兩江總督  
陸建瀛奏臣行抵廣濟飭令壽春鎮總兵恩長督兵趕赴下巢湖  
左右駐紮隨接向榮知會賊匪拗船千餘隻水陸並下恐上游兵  
單萬難堵截須撤赴九江併力合勦以期有濟臣當照會恩長酌

量辦理一面飛咨江蘇安徽各撫<sub>臣</sub>於入境水陸要路嚴兵防禦旋據前路探報該逆於正月十八日五鼓順流蔽江而下恩長分水陸三路接戰督率水師太湖協副將劉長清等連開大礮擊碎賊船三十餘隻擊斃賊匪先鋒四五百人該逆抵抗愈聚愈多該總兵自用鳥槍炸裂猶揮兵轉戰力竭投水身死<sub>臣</sub>所帶兵勇均隨恩長赴防<sub>臣</sub>營僅畱四百餘名而該逆注意江甯省城竟欲分股竄擾見在九江一帶緊急<sub>臣</sub>所帶兵勇不敷勦辦雇勇亦未到齊聞向榮統兵前來卽圖面商一切本日前途探稱該逆已在姑塘一帶放火伏思江甯爲三江根本重地及蘇浙淮揚之屏障該逆既有徑竄滋擾之說關繫更重<sub>臣</sub>自應趕回江甯會同祥厚楊文定福珠洪阿等趕辦防堵事宜維持大局其江西既有向榮安徽亦有周天爵均可與各撫<sub>臣</sub>妥商防守<sub>臣</sub>未便稍事拘泥

安徽巡撫蔣文慶奏本月十一十三等日屢著臬司張熙宇等稟

探得賊過老鼠峽督

臣

陸建瀛退駐彭澤距小孤山五里又於十

三日據副將田大武稟陸路賊匪甚眾已抵湖北雙城驛離宿松界不過數十里伏思賊匪水陸兼進逼近皖界若長驅徑過則各該處所駐兵勇至多亦不過千餘名斷難阻遏見各省陸續到兵除添助小孤山駐防及撥赴宿松陸路堵守外省垣存兵按垛派人尚不敷用而所調浙江山東江蘇各省官兵尙有未到者二千餘名疊次迎提杳不見至此時水陸堵截萬分喫緊陸建瀛旣因賊氛近逼九江不能溯流直上而九江以下隘口惟小孤山爲天生險要實江南數省咽喉若舍之不守則過此以往由皖省直達金陵並無可守之險矣 上諭內閣陸建瀛奏賊匪東竄總兵陣亡自請治罪並以江甯緊要折回防勦各一摺賊匪自竄踞武昌

後屢經降旨令陸建瀛馳赴九江會同張芾勦辦乃由水路前進  
已覺遲緩及聞所派鎮將於上游接仗失事該大臣輒卽退保江  
甯毫無布置實屬大負委任陸建瀛著先行革職仍責成辦理地  
方軍務一面防守江甯一面派兵援應安徽以觀後效向榮追賊  
見已馳抵九江著卽分派將弁督帶精兵奮力追剿前經屢次降  
旨諭令琦善先飭陳金綬帶兵馳赴安徽扼要策應乃本日據蔣  
文慶奏報河南援兵尙未到皖陳金綬是否起程琦善何日前進  
迄今尙未據奏報江皖待援甚急該大臣豈竟置若罔聞耶琦善  
著先行革去都統銜以示薄懲見在賊匪東竄密邇九江陸路賊  
匪距宿松甚近若不痛加勦洗則蔓延幾不可問陳金綬著卽選  
帶將弁精兵星馳赴皖琦善亦著督兵前進爲陳金綬接應仍隨

直下儻該大臣等仍前玩泄致江皖或有疏虞朕惟知執法從事  
不能稍從寬典也懷之○諭軍機大臣等本日屢據陸建瀛奏賊  
匪東竄九江危險見擬折回江甯兩摺又據蔣文慶奏安徽望援  
不至情勢緊急一摺披覽十分憤恨已明降諭旨將陸建瀛革職  
仍責令辦理地方事務以觀後效矣陸建瀛前赴九江由水路行  
走已覺遲緩乃抵潯十日毫無調度賊鋒甫接一戰而潰以致總  
兵恩長陣亡束手無策藉口防堵江甯竟委江西安徽於不顧實  
屬大負委任本日僅予薄懲令其戴罪自贖因思恩長既經殉難  
尚有劉長清管帶兵勇船礮此時駐紮何處所帶馬礮有無遺失  
前調之楊冠春周鼇方翔等何以不能接應張芾以寡弱兵力駐  
守九江見在情形若何摺內均未敘及至周天爵幫辦安徽防堵  
尚未奏報起程且並無管帶之兵向榮派赴九江之兵未知何時

趕到而陸建瀛亦未與向榮面晤何以輒稱安徽有周天爵九江有向榮恃爲無憂以便其抽身之計耶江甯省城誠爲重地該大臣既知折回與將軍巡撫等極力保衛豈九江安徽非陸建瀛管轄之境設有疏失罪尚可逭耶該逆旣已水陸並下安徽最爲危險必當先其所急茲又嚴催陳金綬迅卽帶兵飛速前往安徽救援著向榮陸建瀛竭力設法要截小孤山等險隘此處不守縱賊直下卽陸建瀛欲以畱營之兵四百名捍衛江甯庸有濟乎惟有扼險堅守與向榮合力夾擊俾賊匪不得疾駛而東一面嚴防安徽與蔣文慶激勵紳民安籌固守並著飛咨周天爵促令迅赴安徽協同防堵周天爵如有素所練習壯勇可資捍禦者並卽帶往酌量派撥應用田大武防守宿松應行添調之兵如何酌量調撥未到安徽之浙江山東江蘇官兵如何催令趕到著卽相機布置

至江甯籌備防堵節經諭令祥厚楊文定等慎密辦理此時一聞警信深恐人民張皇無措且賊勢剽急尤須偵探確實以備不虞仍著祥厚陸建瀛楊文定等遵照前旨妥速籌商其揚子江京口一帶南北咽喉關繫甚重萬不可令匪蹤闖入著楊殿邦等遵照前旨察看形勢卽行籌辦朕日夕南望焦慮不能稍釋張芾何以並無奏報更深懸繫著卽迅速查奏將此由六百里加緊各諭令知之○諭本日據陸建瀛奏賊竄九江退回江甯防守並蔣文慶奏皖省危急援兵不至各摺已將陸建瀛革職並催各路官兵飛速赴援矣賊匪未經竄出武昌朕早料其東下長江安徽緊急疊經降旨著該大臣先令陳金綬迅帶精兵馳赴安徽迎勦該提督素性勇往何至屢奉諭旨遷延不進乃兼旬以來並未報帶兵起程日期見在到豫官兵數已不少何不可酌量抽撥催令帶往乃

竟置若罔聞坐觀鄰省危急不救是何居心已明降諭旨將琦善革去都統銜以示薄懲本日復諭令陳金綬自行選帶官兵星馳前往安徽應接琦善仍著遵旨兼程前進爲陳金綬接應今賊勢已全股東下豫省情形與前不同豈可以有用之兵置之無用之地儻以兵未到齊爲詞不卽赴援或稍有掣肘俾陳金綬不能趕緊啓行致安徽復有疏失朕必將琦善在軍前正法斷不饒恕如能出奇制勝力挫賊鋒保全下游大局朕仍望琦善努力成功爲朕分憂也將此由六百里加緊諭令知之○諭前因賊匪勢將東竄下游喫重朕以陳金綬久歷戎行屢次諭令管帶精兵迅赴安徽一帶迎剿該提督疊奉嚴旨自應趕緊啓程何以遲之又久未據奏報豈因琦善以兵未到齊爲詞致令遲延不進耶見在賊匪業已東下據蔣文慶奏亟望該提督帶兵赴援陳金綬係朕特命

幫辦軍務

金

正月十一日

三

幫辦軍務所有豫省調到之兵卽著擇其精銳者自選數千並選  
帶得力將弁星速馳往安徽扼要援應該提督軍營必須文員襄  
辦一切事宜卽著勝保同往安徽並將啓程日期迅速奏報陳金  
綬與向榮皆昔日楊遇春部下將弁軍情緩急自必熟諳今爲朕  
禦此巨寇長江兩岸安徽江甯兩省安危所繫汝兩人聲勢聯絡  
相機進攻若能出奇制勝保衛江東庶不負朕委任倚重之至意  
也勉之慎之將此由六百里加緊諭知陳金綬並諭勝保知之○  
予江西陣亡總兵官恩長提督銜祭葬世職如提督例謚武壯○

乙丑向榮奏

臣

於正月初三日收復武昌卽督兵跟勦於初四日

晚追至葛店趕上賊船開礮擊沈二隻並拋擲火彈立燒近岸賊  
船三隻餘船均順流下竄當令各營挑選奮勇兵壯共得二千四  
百餘名不帶鍋帳

臣

親率總兵和春秦定三李瑞玉山及革員福

興等管帶晝夜疾追欲鈔往九江截賊東下之路途聞撫臣張芾  
由九江移至瑞昌縣防堵臣卽於初八日戌刻趕至瑞昌已繞過  
逆匪之前因會晤張芾云下游巢湖紮兵二千三百餘名北岸老  
鼠峽亦紮兵千六百餘名陸建瀛帶兵二千餘名並師船紮離下  
巢湖三十里之龍坪堵截可以遏其下竄等語臣訪查下巢湖一  
帶防禦實未得法深慮賊至貽誤事機必得親往布置與陸建瀛  
會商酌辦卽於初九日五鼓帶同兵勇繞道往下巢湖至午刻約  
離十餘里卽據報探賊船已過下巢湖該處防守官兵均經潰散  
大礮火具盡已資敵陸建瀛亦折回九江見在賊船旣駛過下巢  
湖離九江僅百里順流直下瞬息可到情形十分危急臣復折回  
瑞昌派總兵和春等帶隊星夜趕往連日大雨軍士冒雨前進備  
極艱苦旋聞賊船已至廬家集一帶離九江僅三十里城內百姓

搬徙一空防城器具一無所備止大礮火藥極多無兵防守陸建瀛已由九江折回下游一帶不知泊於何處聲息不通情形至此萬分焦灼急欲趕救九江城池催兵直至官牌峽詎料賊船亦於十一日早先到十餘隻駛至九江河岸經各鎮將迎前轟擊打壞賊船七隻該逆不能抵禦馳往北岸灣泊時大隊賊船千餘連檣而至兵勇開破轟擊該逆一面拒敵一面分十餘處擺岸灣泊約五六千人紛紛前來臣指揮官兵分路極力衝殺從辰至午斃賊不少兵勇亦有陣亡受傷該逆又將近城小河浮橋砍斷以阻我兵進路見在賊至九江我兵須渡過北岸始可直達安慶若仍從大江南岸追蹤既恐繞道太遠又小河極多並有鄱陽湖之隔該船隻順流追擊庶可得手臣昨已札飭興國州趕辦船隻又飛咨

張芾趕緊雇覓星夜放下以備追剿惟我兵到此無路繞往賊前  
如提臣陳金綬統帶北兵能趕到安徽一帶安慶始可無虞至閩  
省官兵三千名聞其走散九百數十名之多經臣飛咨江西湖南  
福建各省督撫提臣轉飭經過各文武一體按名拏辦以徵效尤  
該管帶兵將備漫無覺察實屬咎有應得且派令防守武昌打仗  
亦不得力所有帶兵官參將周兆麟等均請旨先行革職以肅軍  
令總兵郭仁布統率無方咎亦難辭惟打仗尙無退避情事請旨  
交部議處至防守下巢湖官兵如何潰散亦否陸建瀛查明嚴行  
參辦臣見將官兵暫紮花船溝一帶離九江二十餘里一面催趙  
未到官兵趕緊前來一面查探賊蹤相機籌辦 上諭內閣見在  
賊勢已近九江而我兵先後趕到行走尙爲迅速著向榮督率鎮  
將等無分水陸相機追剿陳金綬此時諒已統帶北兵趕赴安徽

一帶與向榮合力夾擊並著陸建瀛張芾蔣文慶等於大江兩岸  
沿途節節扼要堵截毋得稍有疏虞至福建官兵中途走散竟至  
數百名之多帶兵將備不能約束咎已難辭且派令防守武昌縣  
打仗亦不得力所有署泉州參將周兆麟漳州遊擊顧得欽都司  
陳光標提標遊擊陳金鑾汀州遊擊高士濬均著先行革職仍飭  
將逃兵嚴拏重辦以肅軍令總兵郭仁布統率無方所請議處之  
處著改爲革職畱任以示懲儆○諭楊以增奏豐工冰泮進占情  
形一摺據稱本月初六七等日連得東風大河迎溜背溜處所積  
凌壘解隨卽督飭在工人員星夜進占見在金門收窄僅存十餘  
丈兩端再進一占察看風色溜勢卽當開放引河等語前經屢次  
諭令該河督等趕緊籌辦茲屆大工垂成必須於桃汛未至之先  
剋期歲事著楊以增督同查文經嚴飭在工各員等認真趕辦及

早令龍毋稍延緩○諭張亮基奏勦辦土匪事竣一摺湖南瀏陽縣匪徒周國虞設立徵義堂名目勾結多人膽敢分撲縣城營盤經陝西候補知府江忠源於上年十二月十八日痛加勦洗將脅從之民先行解散江忠源一面飛咨總兵經文岱帶兵嚴堵北路十八盤險隘一面率帶文武紳士督同團練將匪巢焚毀緝獲要犯陳國材並搜獲匪首陳朝涇陳德昭等解送到營統計十八日至三十日屢次生擒暨各鄉團擁送其獲匪徒六百七十餘名臨陣殲斃及鄉團格殺其七百餘名先後發給印帖解散脅從四千三百餘戶奪獲軍器火藥甚多地方一律肅清良民安堵辦理尙爲妥速所有獲解各犯除業經正法梟示外餘著迅速審辦在逃之周國虞曾樂珍鄧萬發三犯仍著嚴拏勿任稽誅勦辦此案之出力文武員弁紳民均著准其酌量保奏候朕施恩用昭激勸○

諭軍機大臣等向榮奏督兵追堵賊船情形並遣撤閩兵各摺片  
逆匪連檣東竄該大臣挑選壯兵二千餘名隨同各將官晝夜兼  
程不帶鍋帳冒雨前進繞至賊船之前行走尙爲迅速所稱將士  
艱苦情形一切具悉果能如此出力盡洗從前遷延惡習賊氛雖  
熾何患無功著該大臣隨時查察傳旨酌量獎勵以作士氣逆匪  
已至九江我兵無路可繞賊前已由該大臣札飭興國州趕辦船  
隻又飛咨張芾趕緊雇覓見在船隻是否效用不至誤事本日又  
據張亮基奏已飭音德布等管帶礮船前往聽調亦不知此時曾  
否駛到著向榮分別催集於安徽江甯大江兩岸無分水陸趕緊  
追勦勿令賊匪占踞江口截我南北之路陳金綬統帶北兵已屢  
次催令趕赴安徽並令琦善帶兵從後接應陳金綬此時如已馳  
抵安徽一帶該大臣卽當隨時知照兩路合爲一氣聲勢聯絡併

力夾攻向榮與陳金綬皆昔日楊遇春部下出色將弁素悉兵機必能和衷共濟出奇制勝殄此妖氛行軍之道緩急應變惟在臨時酌度既不可畏葸失機亦不可輕率貽誤汝兩人經朕特簡但期謀勇兼施一切調度朕亦不爲遙制至福建官兵旣無裨益該大臣擬卽遣撤回營以節糜費所辦甚是此外各營兵丁如有似此怯懦者著該大臣隨時裁汰其防守下巢湖官兵如何潰散北岸老鼠峽官兵如何堵截情形一併確查具奏將此由六百里加緊諭令知之○諭周天爵奏探訪賊匪情形並籌防各摺片見在賊匪東竄已近九江安省防堵十分喫緊所稱欲募萬人備用無論猝難招集經費亦難籌畫且人數眾多恐滋流弊著周天爵仍遵前旨卽將見在所募親信練勇或數百人或千餘人自成一隊察看何處喫重卽督率前往防勦無誤事機將此由六百里加緊

諭令知之○諭張亮基奏遵調將弁船械不敢牽制等語本日據向榮奏到賊船於本月十一日駛至九江該大臣由陸路跟追見在離九江二十餘里之挖船溝一帶暫紮飛催後路各兵力籌進剿惟逆船壓江而下勢甚迅捷我兵無路繞往賊前須從九江渡過北岸始可直達安慶若仍由大江南岸追蹤繞道甚遠且有鄱陽湖阻隔我兵迫於奔命以疲兵而禦強寇勢難制勝莫若多覓船隻順流追擊各等語自係實在情形該逆已至九江東下官兵隨後追剿需船甚急若稍有遲延必致一誤再誤所有盧應翔礮船及音德布韋中魁韓世禧鄧紹良各員既據分別飛催著卽將何日起程何日到營計程若干有無遲逾之處一一查明分晰詳奏向榮孤軍前進軍行糧隨最關緊要張亮基署理湖廣總督責無旁貸務須及早籌備源源接濟毋得以不敢牽制空言塞責至

所稱挑兵數百湊成千名俟抵岳州再爲籌畫一節並著迅卽調集催進毋致誤事武昌省城及黃州府城被賊搶去軍餉若干係何省批解張亮基此時想已由岳州馳赴武昌著卽詳細具奏並飛咨該部查覈將此由六百里加緊諭令知之○以盛京刑部侍郎景淳爲吉林將軍○實授欽差大臣向榮湖北提督○丙寅諭軍機大臣等前因賊匪勢將東竄屢次諭令陳金綬管帶精兵迅赴安徽一帶迎剿並諭琦善兼程前進爲陳金綬接應本日據蔣文慶由六百里加紧馳奏賊匪全行東下已到小孤山省垣危在呼吸屢次迎催陳金綬前往應援僅據霍邱縣探報云該提督帶兵由羅山光州固始到安徽潁州一帶繞道湖北黃州府尙無起身確期等語覽奏實深焦灼賊艘連檣而下昨據向榮馳報督帶精兵趕抵九江惜無船隻北渡不能直達安慶見已趕緊覓辦由

水路追擊如陳金綬統帶北兵迅速趕到安慶始可無虞陳金綬  
疊奉諭旨嚴催若仍繞道湖北更恐緩不濟急著卽徑由霍邱縣  
取道六安州不分星夜兼程直赴安慶以救危急並與向榮合爲  
一氣聲勢聯絡隨時知會城內官兵前後夾擊堵其東竄之路琦  
善統帶重兵仍遵前旨星速前進徑赴皖省與向榮大營相爲犄  
角同心協力保全下游大局萬不可再有遲延致誤事機陸應穀  
此時已自省城折回南陽否賊匪全股東下豫境防兵除酌畱將  
弁扼要守禦外其餘官兵均當直赴皖省接應見在吉林馬隊已  
由京全數啓行黑龍江馬隊亦陸續到京次第前往此項勁旅應  
由何路趕赴皖境以備策應著琦善陳金綬酌度迎催毋任迂道  
致延時日軍營糧餉並著陸應穀派員經理源源接濟無稍貽誤  
將此由六百里加緊各諭令知之○諭蔣文慶馳奏採聞逆匪全

股入皖省垣危急請催援兵一摺覽奏不勝焦急向榮昨日報到  
已由陸路兼程趕到九江飛咨張芾及興國州迅雇船隻卽圖東  
下如此時船能應手計已順流前赴安徽應援該撫務當督率文  
武紳民嬰城固守以待援兵一面分飭所屬安撫居民尤應稽查  
奸細晝夜巡防無稍疏懈嗣後文報如遇道路梗塞著飛飭驛站  
州縣設法改道星速馳遞以慰朕懷將此由六百里加緊諭令知  
之○以書元爲盛京刑部侍郎恆春爲奉天府府尹降調尚書○丁卯  
諭內閣大學士軍機大臣會同刑部定擬賽尙阿罪名一摺已革  
大學士賽尙阿經朕節派欽差大臣辦理廣西軍務未能迅速勦  
賊致令蔓延楚省勞師糜餉深負朕恩賽尙阿著卽照裕誠等所  
擬按律定爲斬監候秋後處決並著將伊子鑾儀衛冠軍使崇緒  
禮部主事崇熙工部主事崇綺吏部員外郎崇絢一併革職○諭

軍機大臣等向榮張芾奏賊船東下趕赴九江一摺逆匪已至九江我兵無路可繞賊前已由該大臣札飭興國州趕辦船隻並飛咨張芾趕緊雇覓以期迅速進剿見在向榮統帶官兵馳抵挖船溝一帶所雇船隻是否可濟急用其盧應翔及音德布等管帶礮船屢次降旨嚴催已據張亮基飭令啓程是否業經趕到不勝懸繫見據蔣文慶奏已將安慶省城糧餉軍裝移赴廬州該撫與藩司仍在省垣防守若賊至皖省空城無可據掠連牆直上則江南獨當其衝勢甚危急向榮統率大軍惟當察看情形何處緊急卽須迅往應援仍隨時知照陸建瀛楊文定蔣文慶等合力夾攻以勦爲守陳金綏如已到皖著卽會同籌辦無論水陸及江口要隘相機堵截勿令賊匪占踞截我南北之路張芾見駐九江是否可恃並著隨時奏報以慰朕懷將此由六百里加緊各諭令知之○

安徽巡撫蔣文慶奏皖省城垣單薄各路援兵未到城中居民遷徙一空糧餉軍裝所關非細萬一盡爲賊有更助兇餒臣接周天爵來函以皖城萬無守理迅催臣飭令兩司攜帶餉銀退保廬州屬臣帶兵馳赴正陽一帶既可策護糧餉復可爲金陵後路援應臣亦未敢拘泥致誤事機遂速將糧餉軍裝分水陸兩路押赴廬州臣仍督同藩司統帶官兵在省奮力勦賊工部左侍郎呂賢基奏臣昨閱邸鈔知陸建瀛因鎮將失事退守江甯毫無布置查江防須扼重上游小孤山爲江皖第一門戶至皖省以下如貴池之擋江磯羅刹磯銅陵之鵠頭磯繁昌之三山磯板子磯蕪湖之礮磯螺兒墩等處次第相接形勢險要均可分設水砲安置礮臺其下則當塗之東梁山和州之西梁山兩山相距僅三里許矗立水際對峙如門江流至此一束所謂天門山者尤爲天然關鍵又南

岸迫東三十里有采石磯峭拔斗峻最爲中流要隘守金陵者必先制勝於此至總督兼轄水師固應多調戰艦以備防勦儻一時未能調集惟木筏最爲適用查南京城外龍江關上河下河等處木筏雲集其上可以築牆安礮攔截江心不爲風浪所撼尤足以抵禦賊船而沿江柴船頗多亦足備火攻之用應請飭令陸建瀛於江面險要處所迅速布置至陸路賊匪逼近宿松若由宿松驛路取道江北則由太湖桐城舒城合肥下巢湖達江僅五百餘里江北以廬州府爲最要廬州以巢湖爲最要蓋廬郡爲七省都會江皖水陸皆恃此爲屏蔽且其地多匪棍毗連鳳潁黨與聲息互通必須重臣駐紮此地既可扼賊北竄又可彈壓土匪又查巢湖在廬州府東五十里跨合舒廬巢四縣向來江北用兵多於此練習水師聞近年常有盜船出沒其中若令地方紳士購錢招募懸

賞錄用遇賊順江東下卽令其駛出江口與梁山鎮水師合力邀  
截必可獨當一面見在皖省大員防守喫緊未能兼顧惟周天爵  
曾任廬州知府民情素所洞悉應請旨速飭周天爵駐紮廬州相  
機籌辦以爲江皖應援 上諭見在各路援兵未能到齊蔣文慶  
將省城糧餉軍裝押赴廬州該撫仍當與藩司等在省極力防守  
毋稍疏虞一切布置機宜蔣文慶旣與周天爵意見相同著卽會  
同籌辦向榮諒已尾追東下省城見有防兵或周天爵所募練勇  
能與向榮併力夾攻亦可以挫該逆揚帆直下之勢至巢湖爲陸  
路要隘急宜防守鳳潁一帶土匪眾多尤宜設法彈壓招徠勿致  
爲賊所誘呂賢基到皖尙需時日先著該撫等熟商妥辦該逆慣  
用地雷所有空濛甕聽等法爲守城要務必須豫爲籌備○諭昨  
據蔣文慶奏探聞賊匪已由九江東下本日復據馳奏賊情緊急

等語見在皖城告警金陵一水直下勢亦危急陸建瀛自九江折回沿途作何布置本日侍郎呂賢基奏籌畫江防一摺著摘錄發給閱看所稱各處磯墩節節險要原可設立水砦安置礮臺惟賊鋒已偃旣恐措置不及且沿江兩岸袤延數百里零星分設兵單勢弱亦恐無裨守禦止可就扼要處所迅速設防仍須以重兵紮營護礮或省城外江岸屯兵互爲犄角見在大江南北惟向榮一軍可資應援該督撫等務與聲勢聯絡以期彼此策應遏賊登陸之路又有人奏豫防地雷空濛甕聽之法一併鈔給閱看著陸建瀛等妥籌辦理一面仍遵前旨星速派兵援救安慶一面會同祥厚楊文定督飭鄒鳴鶴祁宿藻等將省城內外一切防守事宜籌畫周密毋致臨時失措其瓜州京口一帶仍責成楊殿邦督同地方官妥爲防範不可稍有疏虞將此由六百里加緊諭知陸建瀛

楊殿邦楊文定並諭祥厚霍隆武文藝知之○命工部左侍郎呂賢基馳赴安徽賞前任漕運總督周天爵兵部侍郎銜並會同安徽巡撫蔣文慶辦理軍務○戊辰諭內閣琦善陳金綬奏分帶官兵進剿一摺前因逆匪自武昌東竄皖省待援甚急屢經降旨令陳金綬帶兵赴皖截擊並令琦善督兵前往接應茲據奏稱陳金綬於本月十九日先將已到之直隸提標暨各鎮兵管帶啓程馳赴安徽一帶截剿琦善亦於是日帶兵前往湖北江西一帶沿途確探何路喫重卽由何路相機截追見在賊匪已逼皖省情形緊急陳金綬著卽迅赴安慶等處琦善所帶之兵亦應徑赴安徽爲陳金綬後路接應若由湖北江西繞道轉恐緩不濟急該大臣等自豫啓程已屬遲延必須兼程馳赴賊匪所在地方儘力追截毋得再涉糾緩致誤事機昨已有旨令勝保同陳金綬帶兵前進茲

據奏該員於未奉諭旨之先自請同往尙屬奮勉可嘉琦善等啓  
程後糧餉一切著陸應穀派委幹員源源接濟河南防堵事宜仍  
著該撫督同藩司鄭敦謹妥爲籌辦毋稍疏懈○向榮奏臣追賊  
至九江打仗因繞道折往下巢湖致該逆得以先期駛到九江十  
一日將船灣泊城外因空城無所捕掠將廟宇衙署稅廠焚燒卽  
於十二十三兩日陸續開船下行並據逃出民人聲稱武昌被督  
百姓沿途逃散者不少故該逆所過地方多未攏岸臣見將官兵  
暫紮九江城外惟逆船順流下行我兵陸路奔馳勢難趕上且到  
江南陸路須從九江渡河由北岸追剿始可直達安慶臣前札飭  
興國州趕辦船隻能否辦得尙無信息臣於到九江時卽派遊擊  
朱占龍駛往大姑塘一帶雇覓船隻提臣蘇布通阿等統帶川兵  
駐紮金口臣已咨調前來並屬於上游順便覓船帶下以便渡江

惟兵勇既無餉銀又無糧米連日風雪交作實有凍餒之虞

臣見

已飛咨撫

臣

張芾迅提銀十萬兩解赴大營並多張告示招商復

業派弁赴各村莊採買米糧以資接濟至郎中盧應翔礮船前接

徐廣縉復函於長沙解圍時已經撤退其上游雇覓船礮亦久未

見到

臣見

已飛催副將鄧紹良星夜帶兵東下總兵音德布所帶

滇兵千餘名見已調來差遣惟逆匪自擄得多船水陸往來無阻

我兵止能於陸路追剿難從水面闌擊故非水師礮船不能闌江

截勦

臣見

飛咨兩廣督

臣

葉名琛速調外海水師戰船並快船大

爬等項湊足百隻多配子藥遴員統帶由海道駛至江南迎頭堵

擊至賊船阻風尚在湖口縣一帶灣泊離九江僅二三十里

臣一

俟催到餉銀解到船隻卽催兵趕緊渡江跟蹤追勦江甯將軍祥

厚江蘇巡撫楊文定江南提督福珠洪阿江甯副都統霍隆武奏

鎮江瓜州爲南北咽喉重地漕臣楊殿邦奉諭駐紫江口辦理防禦若待其到後調兵恐致遲誤臣楊文定隨於徐州河標吳淞蘇鎮太湖等營酌調兵丁五百名師船八隻駛赴鎮江一帶豫備漕臣調遣並飛飭上海道雇募廣艇鎮江府雇募水摸赴甯備用至於勸捐助餉早已分飭各府竭力籌辦見又先將句容丹陽兩縣漕糧全數截畱分運江甯鎮江兩處備用其餘各府分別酌畱所慮兵力無多接勦諸臣尙無確信請旨速飭琦善向榮陳金綬剋日繞出賊前跟蹤追勦不得再事濡滯楊文定又奏督臣陸建瀛回省據稱已將蕪湖防兵撤歸東西梁山臣思蕪湖爲江蘇全省水陸要隘該處荻港板子磯等亦經督臣奏明設防今倉卒撤回恐上游不免震驚而東西梁山亦難布置周妥上諭軍機大臣等逆船順流下行我兵陸路奔馳勢有難及自係實在情形見在

安徽省城遷徙一空糧餉移至廬州我軍船隻儻不應手亦難飛渡琦善陳金綬已於本月十九日自信陽馳往安徽而陸建瀛倉皇折回江南城大兵單亟望援兵相助向榮著卽督率大兵由陸路馳抵江南興祥厚陸建瀛楊文定等會籌守禦其江口上下並與文藝楊殿邦等扼險設防毋令占踞要口致遏南北之路如上游所調船礮趕到即可水陸夾擊與琦善陳金綬亦可聲勢聯絡互爲犄角至所需銀餉已諭令張芾迅速提銀十萬兩委員管解大營並諭令張亮基等將糧臺銀米迅解江西交張芾派員接辦仍諭令籌畫源源接濟至九江以下所過江安兩省州縣如有漕糧及庫存銀兩倉儲穀石均著該大臣提用以濟急需已另諭陸建瀛楊文定等遵辦矣將此由六百里加緊諭令知之○諭本日據向榮奏追勦賊匪急需接濟軍食等語向榮見已馳抵九江應

援離楚省糧臺較遠軍營需餉刻不容緩著張芾於該省無論何款迅速籌備銀十萬兩飛解該大臣營中應用並派委司道大員督辦糧臺隨營接濟儻因銀款不敷或將鄰近州縣見徵漕糧及常平倉穀各項動撥總期移緩就急無誤軍需將此由六百里加紧諭知張芾並諭陳孚恩傅諭陸元烺知之○諭前據向榮奏請調廣東水師戰船已有旨飭令飛咨葉名琛等調撥應用見在賊匪東竄江防萬分喫緊已命向榮馳赴江甯迎頭截擊著葉名琛柏貴即將該省外海水師挖罟戰船並快船大扒等項湊足百隻多備子藥遴委水師勇幹鎮將大員統帶星速由海道駛抵江甯聽候該大臣撥用並一面飛咨向榮等一面奏聞萬勿稍有遲誤將此由六百里加緊各諭令知之○諭祥厚等奏賊氣漸近戰守兵單一摺已諭令向榮徑由陸路馳赴江甯應援矣陸建瀛自九

江折回尙望其沿途布置省城恃以無憂乃將蕪湖荻港板子磯等處防兵全行撤歸東西梁山豈皖境安危與該大臣無涉而江省上游險要惟梁山可以扼守餘皆不必設防耶所有江省防守機宜經楊文定與該將軍等設法妥籌仍著陸建瀛遵照前旨一面援應安慶一面與該將軍等和衷商榷計出萬全旣將防兵全行撤歸梁山卽當竭力扼守毋令賊船闖入至向榮大軍由陸路遄行裹糧已竭若不急爲接濟恐誤軍需著該大臣等迅飭沿途各屬府州縣無論截畱漕米及常平義倉穀石速爲研動所撥軍需銀兩亦應通融濟用運赴向榮大軍無稍貽誤其揚子江口經楊文定先行調集官兵師船此時楊殿邦想已趕到一切派撥鎮守均著該漕督速籌妥辦毋誤爲要至蕪湖由東壩可達蘇常二府今蕪湖業已撤防應飭江蘇藩司聯英等就近設備以固藩籬

將此由六百里加緊諭知陸建瀛等並諭鄒鳴鶴祁宿藻知之○己巳諭內閣張芾奏九江失守擬回省守禦並自請治罪一摺本月初十日賊船下竄張芾在瑞昌督兵堵禦十一日趕回九江行至中途探聞府城失守昨據向榮奏報九江城內居民先已遷徙一空是賊匪乘虛竄入旋卽退出不知該處文武所謂嬰城固守者安在該撫雖在瑞昌防堵督率不力咎實難辭張芾著卽革職畱任戴罪自效見在賊竄下游該撫卽株守空城亦屬無益著卽回省與陳孚恩等於沿江一帶密爲防範查拏土匪鎮定人心並委幹員接濟向榮大營軍餉其九江城內卽飭令臬司惲光宸等招集流亡妥爲安撫○諭軍機大臣等張亮基奏馳赴湖北省城籌辦撫綏各事宜一摺逆匪全股東下武昌漢陽兩城見經收復所有招集流亡嚴查土匪在在均關緊要駙秉章已由岳州馳赴

武昌張亮基亦經接受湖廣總督關防並於湖南總局裝米五千石制錢五千緡由水陸運赴北省著卽兼程前往安撫招徠與駱秉章熟商籌辦至所稱兩城收復需用孔繁苦於無可設措等語雖係實在情形惟部撥款項均係極力搜括以供大軍急需猶恐不給若賊退之後紛紛請帑辦理善後該署督試思見在各省何處更能接濟前據駱秉章請撥銀三十萬兩已交戶部速議本日該署督又請於附近各省先行借給一併飭部覆議惟此時籌畫情形支絀萬難卽河南川陝亦均有請撥請畱之款該署督等身任封疆豈不計及全局耶抑明知撥款之艱而姑爲此請耶見在該省漕糧業經展緩或於豐收地方勸令富紳大賈量捐銀米或於各該州縣內酌量碾動倉穀以爲賑恤難民之用當此帑項萬分艱難之時惟在該署督等權其輕重緩急設法籌辦期於庫款

地方兩有裨益若如所云力圖整理與從新辦造無殊則凡一切  
繕修均須請帑何所底止耶向榮大營見在待餉甚急該督務當  
仍遵前旨趕緊籌解源源接濟斷不准將各省解餉藉口截留致  
有貽誤至向榮軍營各省兵丁除裁汰傷亡外見有若干名畱於  
湖南湖北之各省兵丁若干名並所募勇除遣散外仍有若干名  
著卽將約署名數查明具奏武昌漢陽黃州等屬文武各員著卽  
查明如何殉難及是否逃避各情分別詳細具奏毋再延緩將此  
由六百里諭知張亮基並諭駱秉章知之○諭前據向榮奏逆匪  
東竄經寄諭楊殿邦等於鎮江瓜州等處江口派兵防守計已  
接奉諭旨迅速前往扼要駐紮籌辦一切矣所需經費若一一俱  
候部撥勢必緩不濟急著仍遵前旨或截留漕糧抵用或於鹽務  
地方紳商設法捐貸如兩江總督江蘇巡撫會商不及該漕督卽

督同但明倫劉良駒及各道府等設法辦理刻下賊船已過九江  
下游江防尤關緊要因思回空漕船見已渡黃南下且有一千三  
百餘隻之多江甯安徽兩處漕糧亦有旨准其截留此次運船是  
否可以作爲堵截江口之用各幫水手可否飭令幫同防堵著楊  
殿邦悉心體察妥爲布置總期相機防勦毋令賊匪占踞鎖江瓜  
州二口是爲至要將此由五百里諭知楊殿邦並傳諭但明倫劉  
良駒知之○庚午江蘇巡撫楊文定奏移駐鎮江趕辦防堵得旨  
汝旣出省有事可單銜具奏籌辦稍有頭緒自應仍回省垣爲是  
朕見到及此汝可斟酌汝與陸建瀛難期和衷第所辦一事斷難  
分別朕日夜焦思汝旣爲大吏猶不知耶朕知祁宿藻事事盡心  
斷非自顧身家者該員能否出省汝可酌量○辛未諭內閣吏部  
奏參已革巡撫籍病回籍一摺前有旨將已革湖北巡撫龔裕仍

交常大滄差遣委用乃該革員於回籍奉到諭旨後遲之又久始行啓程及行至中途又以舊病復發呈請回籍調理實屬藉詞巧避始終不知奮勉深負朕恩冀裕著卽交刑部按律治罪江西巡撫張芾僅據該革員呈詞咨部並不奏明請旨亦屬不合著交部議處○諭軍機大臣等文藝奏京口兵單難資守禦一摺昨據楊文定奏稱鎮江府所稟旗營閒散人數與副都統所開懸殊並有郡城文武猶若優游無事之語茲復據文藝奏稱先後令地方官修城窆濠均未辦理該城文武不和覽奏實不可解從前英夷滋擾鎮江文武卽因不和失事豈可蹈此覆轍見在楊文定移紮鎮江著卽會同文藝嚴飭該處文武無分畛域迅速籌防儻有疏虞旗營與地方官均難辭罪所有上海船隻曾否由吳健彰雇募備用見在陸路兵單水路又無援應浙江提督葉紹春溫州鎮總兵

陳世忠所轄水師是否尙堪就近調用著陸建瀛楊文定酌量情形如能得力卽令由海入江一面飛調一面具奏至瓜州江口楊殿邦以兵力不敷奏稱擬雇募划船水摸團練壯勇以資抵禦京口亦當豫爲計及豈可但以兵單難守爲詞一籌莫展耶將此由六百里各諭令知之○王申諭內閣周天爵奏軍務喫緊急籌防勦一摺據稱在宿州附近等處地方招募壯勇已得張鳳山等一千二百餘名帶赴正陽關以備防勦惟其中有身犯罪名者懇恩寬宥等語此等無業愚民旣知感悟力圖報效亦何不可赦其旣往予以自新著卽照所請將張鳳山等免罪收錄以備驅策如能殺賊立功仍准酌量保奏此係朝廷破格施恩化莠爲良至意該侍郎其慎加選擇無負委任至宿遷團練章程著卽先行知照附近地方官仿照籌辦○江甯將軍祥厚江南提督福珠洪阿江南

副都統霍隆武江甯布政使邢宿藻奏江南民情游動遇事生風既當嚴密設防必須處以鎮靜兩月以來修補城垣製防備守一切器具地方尙稱靜謐詎督臣陸建瀛因總兵恩長失利卽回舟東下藉口江甯喫緊趕回布置沿途險要並不屯紮更將駛上師船一概撤回專守水路之東西梁山而蕪湖陸路爲入江蘇之門戶亦均撤防於十八日夜半隻身抵省遂致閩城紳民驚擾紛紛遷徙經臣等函屬督臣陸建瀛趕統舟師仍赴上游迎擊乃督臣晏坐衙齋三日並無回信加之撫臣楊文定執意移紮鎮江擅出省城臣等勸阻挽留仍不顧而去民情加倍驚惶遷徙更多省城震動雖有駐紮旗兵奮勇爭先無如兵力太單賊船順流下竄朝發夕至守禦萬分緊迫惟有請飭向榮琦善陳金綬迅速統兵繞出賊前徑抵江甯協力堵勦以固省城根本上諭祥厚等聯銜

參劾督撫一摺陸建瀛自九江折回當經降旨將伊革職仍責令辦理地方軍務旋據楊文定奏函商陸建瀛令其駐守小孤山蕪湖等處乃仍過而不畱並將一路防兵倉卒撤回梁山復未布置周密徑行回省該撫復以省城有專任大臣卽應移守鎮江入奏朕卽知該督撫不能和衷批示訓飭猶冀陸建瀛回省後與同城文武急籌布置力圖補救茲據將軍副都統提督藩司聯銜據實參奏陸建瀛總督兩江朕特授爲欽差大臣令其馳赴九江上游防堵乃遲之又久方抵九江且以水路行走不爲迂緩自解未及調度周妥而賊船已至一戰兵潰不知收合餘燼與向榮大軍合力夾擊並不知力守小孤山扼賊入皖之路又不親督官兵據守東西梁山爲金陵保障遽行折回江甯以致省城紳民驚擾紛紛遷徙官經祥厚等函屬陸建瀛仍赴上游迎擊乃安坐督署三日

並無回信當此危急之時同城文武竟不面商防勦事宜巡撫楊文定遂藉詞防守鎮江卽行出省民情更增惶惑封疆大吏遇事張皇失措退縮自全均屬罪無可逭朕思陸建瀛若不退回江甯省城楊文定何至藉詞出守鎮江合城紳民又何至紛紛驚徙今旣據祥厚等合詞參奏陸建瀛孤恩昧良厥罪尤重著卽交祥厚傳旨拏問委員解交刑部治罪所有欽差大臣關防著祥厚祇領並著兼署兩江總督楊文定奉旨令在江南辦理防堵昨據奏稱楊殿邦尙未行抵揚州鎮江爲入蘇門戶急應移往鎮守並未將該將軍等勦畱情節敘入其爲藉詞退守已屬無疑楊文定著卽革職暫行留任卽責成與文藝率同所屬文武在鎮江協力防守並著與楊殿邦隔江聲勢聯絡於瓜州京口上下各港汊飭屬嚴密設防斷不准折回蘇州及無錫地方以致江口要隘稍有疏虞

向榮大軍瞬卽東下陳金綬統帶勁旅亦即可繞出安徽祥厚膺茲重任著卽率同在城文武傳諭紳民勑力同心嚴密防守並與向榮等內外夾擊務期力挫賊鋒以定人心而固疆圉○諭軍機大臣等祥厚福珠洪阿霍隆武祁宿藻奏參總督巡撫一摺已明降諭旨將陸建瀛拏問治罪楊文定革職暫行畱任防守鎮江並將欽差大臣關防交祥厚祇領兼署兩江總督矣昨有旨令向榮馳赴江甯會籌防剿計日可到琦善陳金綬於正月十九日先後自信陽啓程如由霍山六安取道不惟可爲皖省救援亦可爲江甯接應惟師克在和不在眾近來統兵大員意見稍有齟齬輒不以公事爲重任聽貽誤似此惡習相沿尙望其勦賊立功耶祥厚見署兩江總督責無旁貸應如何擇要布置督兵固守並曉諭居民毋令驚擾著會同福珠洪阿霍隆武督同鄒鳴鶴祁宿藻悉心

籌畫金陵重地關繫匪輕儻稍有疏虞恐難當此重咎鄒鳴鶴平  
日辦事尙屬幹練又係本省紳士曾任大員熟悉賊情祥厚等與  
之籌辦一切必能盡心竭力不負朕望至鎮江瓜州節經降旨令  
文藝楊殿邦分路嚴防楊文定旣已出守鎮江該處安危卽其專  
責若鎮江有警該撫再藉詞退守亦何面目對江東兵民乎此時  
祥厚等惟有和衷共濟力圖守禦東西梁山旣有防兵必當飭令  
盡力堵截一俟向榮兵到合力攻剿庶可大挫賊鋒斷不可再存  
意見致誤事機懷之慎之將此由六百里加緊諭知祥厚福珠洪  
阿霍隆武文藝楊殿邦楊文定並傳諭鄒鳴鶴祁宿藻知之○諭  
前李德奏遇賊北竄莫如扼守黃河當有旨令該河督該撫等一  
體辦理見在賊匪東竄已過九江難保無奸細渡河窺探朕聞琦  
善在豫出示曉諭凡有荆楚口音形迹可疑者概行禁止若搜出

奸匪竄據許民擅殺查辦實爲嚴密著楊以增福濟李德陸應穀  
仍遵前旨分飭所屬廳營州縣並遴派委員各於黃河渡口實力  
盤查遇有緊急卽將船隻收至北岸使無船可掠自難偷渡扼守  
黃北省安危所繫楊以增等若稍分畛域朕必卽以軍法嚴辦  
將此由六百里加緊各諭令知之○諭周天爵奏擇要防堵並募  
勇免罪各摺片據稱皖省之北廬鳳潁亳爲江南屏蔽而正陽關  
尤爲廬鳳必爭之地又係壽州財賦之鄉居淮河之中爲全淮咽喉  
覽其所奏統籌全局不爲無見周天爵見已馳赴正陽關所有  
一切應行豫備之事旣能智有成算著卽酌量情形扼要防守其  
所稱廣招鄉勇赦其重罪一節見當軍務喫緊果有身犯重罪之  
人誠心改悔樂於效命者亦不妨破格收用以冀得其死力惟究  
係權宜之計人數不可太多該侍郎旣已開誠布公自必能操縱

得宜不滋流弊以仰體朕不得已之苦衷也至所奏聞賊另股奇

兵竄至汝甯信陽一帶琦善陸應穀等從未奏及恐係浮言搖惑將此由六百里加緊諭令知之○以長臻爲奉天府尹文俊爲

陝西按察使

由喀喇沙爾辦事大臣選

○以勦辦喀叶噶爾夷匪出力賞兵丁

一月鹽菜銀

○癸酉諭內閣前經降旨令戶部將此次各省捐輸

總數及各府州縣捐輸分數分晰開單具奏茲據該部將山西陝

西四川三省捐生名數及銀數先行開單呈覽各該省紳士商民

因軍務未竣志切同仇輸將踊躍深堪嘉尙除業經隨時降旨獎

勵外著再加恩將捐銀較多之省酌加鄉試中額捐銀較多之各

州縣酌加學額應如何分別擬定名數以昭激勸之處著戶部會

同禮部先將山西陝西四川三省查覈詳議具奏候朕施恩○諭

見在軍務未竣文報往來最關緊要如道路遇有梗塞該管驛站

地方官卽應設法繞道馳遞若不知事體緩急輒將文報擅自遞回貽誤非細著各該省督撫嚴飭臬司通行曉諭所屬州縣凡遇緊要軍報倘道路偶有阻隔藉詞遞回以致貽誤者卽著該督撫奏明嚴參並著兵部隨時稽查將管理驛站之臬司暨該督撫一併參處將此通諭知之○諭軍機大臣等見在軍情緊急文報來往最關緊要本日據兵部接到良鄉呈報竟將正月十九二十兩日由六百里加緊寄向榮張芾蔣文慶等各諭旨夾板全行繳回查檢沿途發單係由安徽金斗驛暨定遠驛兩處遞回似此緊要公文該地方官竟敢任意繳回殊屬大不曉事可見該省巡撫臬司並不以此事爲重以致屬員漫不經心稽遲貽誤蔣文慶著傳旨申飭仍著該撫卽行查明此項夾板究係何處遞回卽將該地方官指名嚴參毋稍徇隱並著各該督撫飭令臬司嚴飭州縣遇

有軍報過境設或前途阻滯卽行設法繞道安速馳遞毋得再有  
遲誤致干重咎將此由六百里諭令知之○甲戌周天爵奏臣行  
抵宿州據鳳陽府知府楊福祺稟十七日安徽省城失守臣飛飭  
前路廬鳳潁滁等府州縣速行招募防堵迅咨琦善帶兵遮護全  
淮並咨陸建瀛竭力守禦臣查賊自竄入長江連破楚皖兩  
省城如入無人之境儻任其彼猖東下必致由清江徐州北竄乃  
提臣向榮不由江北直趨安慶遏賊於前而反統兵數萬迂道江  
南以致重兵處處落後事已如此大兵北來亦恐緩不濟急惟一  
面出示黃河南北廣爲團練招募以資捍衛臣尤慮豐工堵築土  
夫雜入災民惶懼聚集數十萬設一旦伺覺而動則山江皖豫四  
省强悍之徒勢將裹脅而起所以招募團練者卽所以收拾人心  
也臣竊再爲全局計武昌以下所有北調防兵賊到均皆潰散以

致黃河兩岸守兵爲之一空而山東直隸兩省戰兵均已徵調數千不能再撥亟應請旨特簡親信重臣統帶大兵檄飭琦善迅卽克復安慶保守江淮以固河北並牽制逆船不能東犯江省更請飭下山東江南安徽河南四省速行團練招募嚴防黃河上下要隘以杜逆匪北竄之路又奏據楊福祺稟接到舒城縣稟報省城於十七日失守見在尙有解省餉銀三十餘萬兩在定遠未發見以招集散兵截留此項爲急務臣竊意賊破安省定必北竄搶掠當卽飛飭該處道府速解宿州發交徐州道庫以備收集散兵之用臣先詣固鎮紮營卽親赴壽州六穎毫一帶勸捐然後重兵進逼不敢孟浪輕戰惟查皖省止有壽春一鎮前經粵楚用兵徵調已空續又調赴省城防守見在鎮臣恩長業已陣亡餘兵潰散皖江以北一千餘里竟無一兵一將臣所帶勇僅止一千二百餘名

以此進剿數萬強賊斷難制勝見在陸建瀛退守江省向榮按兵  
江南琦善奉旨會同陳金綬帶兵進剿至今尙未到皖應請飭琦  
善就近先帶大兵速來會剿否則皖省江北各郡縣無可收拾卽  
河北亦必不能保矣 上諭內閣周天爵馳奏探聞安徽省城失  
守一摺覽奏曷勝憤懣蔣文慶於本月十七日尙在安慶發報奏  
事茲據周天爵奏稱據鳳陽府及舒城縣稟報安慶省城卽於十  
七日失守省城重地何以一日之間遽被賊匪攻陷是否該撫蔣  
文慶及藩司以下文武各員先期退避抑帶兵守城力竭殉難著  
周天爵迅速查明分晰馳奏安徽巡撫卽著周天爵署理見在賊  
勢分竄南北靡定向榮已有旨令其馳赴江甯一帶協剿琦善陳  
金綬由信陽統帶大兵馳赴皖省計已趕到著遵照疊次諭旨與  
周天爵擇要攻剿琦善等赴援已遲若再坐擁重兵遷延觀望朕

亦惟有執法從事決不姑寬懷之○諭軍機大臣等本日據周天  
爵馳奏探聞安徽省城失守一摺向榮抵九江後數日未見奏報  
朕心寶深焦盼前據張芾奏業經雇備商船六十餘隻並有糧船  
可以撥用該大臣此時是否渡江援應兒在安慶失守江甯防勦  
尤爲喫緊琦善陳金綬帶兵計可趕到皖省向榮著仍遵前旨迅  
赴金陵沿途察看何處緊要卽行扼險截擊儻江甯鎮江已被賊  
擾向榮卽督兵赴援萬勿遲誤省垣重地城大兵單甚屬可慮向  
榮務與祥厚等督率旗營各兵並本省紳民扼要固守不可稍有  
疏虞至鎮江瓜州兩口南北咽喉楊殿邦楊文定文藝等尤當竭  
力嚴防勿令居民驚擾至該處兵單已有旨令琦善酌撥精兵赴  
淮揚一帶交楊殿邦調遣著卽飛咨調撥以資援應向榮軍營兵  
丁除隨時裁汰及打仗陣亡外實在兵數若干名著查明具奏襄

陽荊州調撥各省官兵見在可以移調軍營者著向榮酌量調用  
但須揀選精銳勿以怯懦充數江甯等處地方緊要向榮務當督  
率鎮將極力保護爲要將此由六百里加緊各諭令知之○諭前  
因安徽軍情緊急疊次諭令琦善陳金綬督兵迅速馳往援勦本  
日據周天爵奏安慶省城於本月十七日失守覽奏憤懣之至琦  
善等如能及早應援何至江北失事卽信陽兵未到齊先令陳金  
綬酌帶官兵馳往亦何至緩不濟急欽差大臣自應統籌全局先  
其所急若必待事事齊備按轡徐行亦安用汝等爲耶見在已降  
旨令周天爵署理安徽巡撫著琦善陳金綬趕緊督兵與周天爵  
扼要攻勦儻任賊再有蔓延朕惟統兵大臣是問逆匪竄入安慶  
勢必順流而下直逼江甯該處城大兵單勢甚危急且鎮江瓜州  
江口爲南北咽喉設有疏虞江北一帶藩籬亦難自固琦善陳金

綬統帶精兵萬餘所調吉林黑龍江馬隊不日亦可到齊大軍雲  
集江北前在黃陂駐紮之陝西兵一千七百餘名總兵吉順想亦  
管帶赴皖兵力不爲不厚如賊陷安慶後知我北路有備江南空  
虛勢必急圍金陵圖占江口朕所以命向榮徑赴江南援應正爲  
統籌全局不徒以保守江淮了事琦善陳金綬察看情形必須分  
兵渡江應援斷不可坐視不救至瓜州江口乃北路最要門戶亦  
應於所帶官兵內酌撥防守交楊殿邦調遣與安徽互爲聲援賊  
勢彼猖固應慎重亦不得以有用之兵置之無用之地若能調度  
得宜痛加勦洗大挫兇鋒庶可轉危爲安保全大局切勿堅執已  
見貽誤事機至該大臣所請增給官兵馬乾之處河南省進征及  
畱防各兵與粵楚等省事同一律豈能兩歧辦理著照部議按例  
給發以節糜費將此六百里加紧諭知琦善陳金綬並諭勝保知

之○諭周天爵馳奏安徽省城失守及收募兵勇截畱餉銀各摺  
片並團練章程逆匪水陸分竄九江安慶相繼失守如入無人之  
境實堪髮指周天爵已署巡撫統轄文武所有江北一面責無旁  
貸著卽擇要布置並收集散兵招募義勇以壯聲援琦善陳金綬  
均於十九日統帶大兵啓程赴皖該署撫卽與會商進剿之策見  
在陸建瀛已革職拏問另派祥厚爲欽差大臣並著署兩江總督  
金陵一帶兵力甚單已有旨令向榮直赴金陵援應該署撫如聞  
江甯告警仍應分兵渡江赴援與向榮併力夾擊江北固應保護  
又安可置江南不問朕以天下爲一家豈能不統籌全局耶至安  
慶糧餉軍裝是否運往廬州其解省餉銀三十萬是否已由定遠  
縣解回徐州道庫此項軍需萬不可疏失該署撫見在收集散兵  
及雇募義勇親赴壽州一帶勸捐集團均著照所請行安慶省城

既陷小孤山必已失事巡撫藩臬以下各員文武下落一併查明  
迅速具奏所有團練事宜仍遵前旨行知附近各地方官認真辦  
理將此由六百里加緊諭令知之○命內閣學士許乃釗赴江南  
幫辦防勦事宜○乙亥諭內閣前因逆匪滋擾粵楚各屬城鄉多  
被蹂躪降旨令各直省督撫仿照嘉慶年間堅壁清野之法實力  
舉行並命武英殿刊刻明亮德榜泰築堡禦賊疏龔景瀚堅壁清  
野議及所擬出示曉諭條款著將本年正月初八日諭旨並此旨  
一併刊刻冠諸簡端進呈頒發各直省大吏廣爲刊布轉行所屬  
體察地方情形分飭官紳一體妥籌遵辦○諭前有旨諭令各直  
省仿照嘉慶年間堅壁清野之法辦理團練以資保衛誠以賊匪  
滋擾奔竄靡定與其賊至卽逃何如乘其未至設法自固近來被  
賊各郡縣本境已受其蹂躪毗連各鄰境一聞警急輒紛紛思避

甚至移徙一空委城於賊糧餉軍裝盡被擄掠藉寇兵而齎盜糧深堪痛恨總因地方官素無布置未能固結民心遂致臨事倉皇束手無策因思民間守望相助保衛鄉閭不特被賊地方急宜籌辦卽距賊較遠處所亦應思患豫防惟專責守土之員不免吏胥假手流弊滋多各省公正紳耆旣於地方情形熟悉而人望所繫呼應尤靈前已有旨令侍郎呂賢基馳赴皖省辦理團練自必與在籍各紳士悉心妥籌其江蘇一省卽著在籍之前任左都御史沈岐閩浙總督季芝昌吏部侍郎侯桐左副都御史程庭桂宗人府府丞溫葆淳江西巡撫錢寶琛湖南藩司王藻浙江藩司汪本銓等會同地方官邀集眾紳士酌辦團練事宜此外各省在籍紳士著在京各部院堂官及翰詹科道各舉所知總期通曉事體居心公正素繫人望者責成倡辦自必經理得宜輿情允協當此賊

氣未靖時勢孔艱該紳士等身受厚恩應如何自固閭里爲敵愾同仇之計所有勸諭捐貲濬濠築塞各事總宜各就地方情形安爲布置一切經費不得令官吏經手如果辦有成效卽由該督撫隨時奏請獎勵以副朕爲民除害敉靖疆圉之至意○諭翰林院編修何桂珍奏參已革總督罪難覓宥等語已革湖廣總督程矞采前在衡州防堵一聞警報卽退回長沙賊匪自廣西至湖南一路城池多被竄擾當因糧臺乏人經理將該員革職責令承辦原冀其戴罪圖功以觀後效乃復藉詞告病乞歸較之龔裕獲罪情節尤重若竟令其安居田里不足以服人心程矞采著刑部按律定擬罪名具奏至余萬清劉長清至今尙未解交刑部係在何處遲延著沿途督撫查明迅速押解來京博勒恭武係由岳州退回例應治罪見在如何下落疊經降旨飭查未據奏聞已革參將阿

克東阿前有旨照部議卽行正法至今亦未據覆奏著張亮基等  
迅卽查明由驛具奏湖南湖北失守各州縣文武員弁除已查明  
外其餘各員一併速查具奏毋再延宕○琦善奏臣奉旨星馳進  
勦何敢藉詞耽延實緣豫省州縣積疲自鄭州以南節節無車兵  
丁猶可步行而鑼鍋帳房鉛丸火藥火繩勢不能悉行背負蒙恩  
賞發火藥二萬斤火箭二千枝亦因無廄駝載僅帶火藥二千二  
百斤火箭四百零八枝其餘仍存信陽糧臺他如管帶吉林頭起  
官兵之都統德蒙額迄今未到聞亦等候廄駝且工部頒發火藥  
鉛丸火繩亦堆積信陽無廄駝載其自信陽以南不通車道早經  
臣行令多雇廄駝據省中司道稟稱已派各屬共雇六千頭而解  
到者僅止四百六十餘頭不及十分之一募夫扛運又恐用人過  
多必致洩漏軍情見在提臣陳金綬已帶兵馳往安徽應援在後

之提屬八溝營兵二百名亦經趕到臣飭迅速趕迎直隸提標兵二千名均歸陳金綬統帶庶兵將相習熟其得力通計陳金綬共帶兵四千名火藥則以羸頭不敷馱載每名僅佩帶三百出其餘皆寄存應山縣隨後運送臣亦於二十六日拔營前進僅帶兵一千八百餘名除守護營盤外計打仗兵尚不足一千名鉛彈火藥等件亦須隨後運送其餘仍在信陽守候羸頭恐大名鎮兵一千名行抵信陽亦尚須守候攻勦無具臣萬分焦急已飛咨河南撫臣暨催軍需總局信陽糧臺各司道將後起官兵及鉛彈火藥等項要需加緊提催前進仍隨時源源護送接濟 上諭軍機大臣等琦善奏遵旨前進並陳實情一摺前經疊降嚴旨令該大臣馳往安徽援救乃自正月二十一日在湖北應山東旺鎮奏事至二十五日尚在該處等候馱贏昨已據周天爵奏報安慶失守轉瞬

賊船東駛江南省城危在旦夕該大臣坐擁重兵逍遙楚豫之間必俟馱贏齊集豈不貽誤且贏頭不足勢不能不配用夫扛所有帶兵大小官員本當沿途隨時稽察亦何至募夫過多卽虞洩漏况馱贏六千頭卽須夫數千人此數千人豈盡屬可靠耶河南非產贏之地卽向民間雇用亦豈能驟得六千頭之多春時工作方興田間需贏孔亟若抑勒供應勢必合省滋擾又豈用兵衛民之政乎該大臣明知其故而責以萬不能行之事以爲他日貽誤藉口地步是何居心朕因琦善久任封疆才具優長故畀以重任若不知感恩圖報巧爲趨避是眞無天良矣著卽將解到贏頭先行裝載一切迅速兼程前進其餘配用夫扛一同前往所有募夫及贏夫沿途行走卽飭令帶兵官隨時隨地嚴行查察並著陸應穀檄飭該司道仍行嚴催續到贏頭與續雇人夫將所存信陽糧臺

之火藥火箭等項火速解赴陳金綏軍營以應急需毋再遲誤將  
此由六百里各諭令知之○琦善奏遵旨前進情形奉旨迅速前  
往猶堪補救募夫多不可靠須用廝馱載廝夫豈盡屬可靠耶再  
德蒙額見已馳到以後續到者凡御前乾清門侍衛接仗時何人  
出力何人退縮隨時具奏好者不必候旨卽行保奏庶可鼓勵懦  
者從嚴參辦朕知汝不若賽尚阿之事事從寬也○實授張集馨  
河南按察使以江忠源爲湖北按察使由陝西候補道遷○是月賑直隸  
景州保定縣安徽宿州等四州縣及屯坐各衛水旱災民口糧貸  
山西托克托城被旱災民籽種緩徵山東德州等五十一州縣衛  
水旱風雹災永利永阜二場竈地額賦展緩直隸薊州等四十  
州縣水災新舊額賦並津軍廳葦漁等課